

UDA labur RM80 juta bina pusat peranginan

Najib Tun Razak ditemani Penggerusi UDA Holdings Bhd, Datuk Nur Jazlan Mohamed (kanan) melihat lakaran artis pembangunan Resort 4 Bintang yang bakal dibangunkan di Pekan selepas merasmikan Majlis Pecah Tanah Resort tersebut di Pekan, Pahang, baru-baru ini.

PEKAN 1 Ogos - Syarikat milik kerajaan (GLC), UDA Holdings Bhd. (UDA) melabur sebanyak **RM80 juta** untuk membangunkan pusat peranginan bertaraf empat bintang yang pertama di sini. Pengerusinya, Datuk Nur Jazlan Mohamed berkata, pembinaan pusat peranginan itu merupakan salah satu usaha ke arah penyediaan kukuh bagi menyokong kepesatan pelancongan di daerah ini. "Lokasi Strategik di pinggir Sungai Pahang ini amat sesuai dan pastinya mendapat sambutan hebat daripada pengunjung tambahan pula projek ini merupakan projek pertama di daerah ini," katanya ketika berucap pada majlis pecah tanah pembangunan pusat peranginan empat bintang di sini. Majlis tersebut dirasmikan Perdana Menteri, Datuk Seri Najib Tun Razak baru-baru ini. Menurut Nur Jazlan, pusat peranginan yang bakal digayakan dengan corak hiasan berkonsepkan *modern tropical* itu dijangka siap sepenuhnya pada 2013.

"Ia merupakan sebuah pembangunan pusat peranginan tujuh tingkat di atas sebidang tanah seluas 2.5 hektar di Kampung Peramu, di sini. "Pusat peranginan ini dilengkapi 133 bilik dan turut menawarkan fasiliti yang sesuai untuk pengunjung yang berkeluarga," katanya. Menurut beliau, pusat peranginan itu juga mempunyai dewan utama berkapasiti 450 orang dan lima unit bilik seminar untuk menarik kumpulan perniagaan yang berminat mengadakan program di situ kelak. "Saya berharap pembinaan pelbagai prasarana dan kemudahan canggih yang terdapat pada pusat peranginan ini berupaya mewujudkan persekitaran yang kondusif untuk sektor pelancongan," jelasnya. Beliau menambah, pembinaan pusat peranginan itu bukan sahaja meningkatkan kemudahan kepada pelancong dan rakyat tempatan bahkan meningkatkan sosioekonomi penduduk tempatan menerusi peluang pekerjaan yang bakal disediakan.

2 Ogos 2011 (Selasa)**Ekonomi - Risma sedia perkasakan industri getah Sabah**

KOTA MARUDU 2 Ogos — Pihak Berkuastra Kemajuan Pekebun Kecil Perusahaan Getah (Risma) sedia memainkan peranan penting untuk membantu memperkasakan pembangunan industri getah di Sabah, terutama memajukan tanah pekebun kecil. Penggerusi Risma Holding Sdn. Bhd. Datuk Abdul Rahim Ismail berkata, Sabah memerlukan satu mekanisme yang lebih dinamik untuk memperkasakan industri getahnya dan Risma mempunyai pengalaman dan kepakaran untuk membantu mencapai matalamat itu. "Pihak kami (Risma) telahpun membuat tinjauan ke seluruh negeri dan memperoleh maklumbalas positif daripada para pekebun kecil getah terhadap program dan rancangan pembangunan Risma. "Ramai pekebun kecil getah di negeri ini berminat untuk mendapatkan bantuan Risma bagi membangunkan tanah-tanah mereka. "Untuk tujuan itu, 48,000 hektar kebun getah individu di Sabah akan terlibat secara langsung melalui 14 program pembangunan yang akan dilaksanakan Risma di Sabah," katanya kepada Bernama di sini. Program pembangunan itu termasuk pembangunan tanah dan tanam semula, iaitu bantuan menanam semula menggantikan getah tua dengan klon getah bermutu tinggi.

Selain itu, program tersebut juga meliputi usaha mempelbagaikan sumber pendapatan para pekebun kecil getah melalui industri kampung dan penempatan hasil, selain program latihan sawit pekebun kecil. "Risda sedia menimbang permohonan daripada para pekebun kecil yang memiliki tanah berstatus CL (commercial lease) dan LA (land application, terutama sekali yang memperolehi communal grant," katanya. Menurut Pengurus Risda Holding itu, Sabah mempunyai kawasan tanaman getah seluas 70,000 hektar. Terdahulu, Abdul Rahim, yang juga anggota Dewan Undangan Negeri Pantai Manis, merasmikan mesyuarat agung kedua Koperasi Pekebun Kecil Bumiputra Sabah Berhad (Kospeb), Kota Marudu. Dalam ucapannya, beliau meminta kepimpinan Kospeb merancang aktiviti perniagaan yang lebih kreatif serta berdaya saing bagi mempelbagaikan sumber pendapatan koperasi serta meningkatkan taraf hidup para anggota. "Kospeb perlu mengeksplorasi segala potensi dalam industri getah, termasuklah mencebur aktifiti penghasilan produk-produk yang mempunyai nilai tambah berasaskan hasil kayu getah seperti alat perabot dan papan nipis. Sebagai pertubuhan bukan kerajaan (NGO), Kospeb juga perlu memainkan peranan aktif untuk membantu mengeluarkan masyarakat luar bandar daripada belenggu kemiskinan, katanya.

4 Ogos 2011 (Khamis)

Nasib 463 pelajar Asrama Yayasan Selangor jadi tanda tanya



EMPAT wakil Persatuan Alumni Asrama Yayasan Selangor menyatakan bantahan terhadap Yayasan Selangor yang ingin merobohkan Asrama Tun Dr. Ismail dan Asrama Toh Puan Norashikin di Kampung Pandan, Kuala Lumpur, semalam.

KUALA LUMPUR 4 Ogos - Tindakan kerajaan Parti Keadilan Rakyat (PKR) Selangor mahu merobohkan Asrama Yayasan Selangor di Kampung Pandan di sini dipercayai untuk menambah aset kerajaan negeri yang semakin berkurangan menyebabkan nasib 463 pelajar asrama berusia 32 tahun itu menjadi tanda tanya. Apa yang lebih membimbangkan, pelajar tersebut tidak diberikan jaminan penempatan lain sekiranya asrama yang menempatkan pelajar luar bandar di Selangor itu dirobohkan. Malah *Utusan Malaysia* juga difahamkan, tiada perancangan alternatif atau asrama baru yang akan dibina untuk menempatkan kumpulan pelajar berkenaan. Wakil Persatuan Alumni Asrama Yayasan Selangor, Badrulzaman Baharuddin berkata, tindakan tergesa-gesa yayasan membuktikan kerajaan Selangor mempunyai agenda tertentu di sebalik tindakan mahu merobohkan asrama berkenaan. Lebih menggejukan, katanya, kerajaan negeri serta pihak Yayasan Selangor seolah-olah mengambil sikap lepas tangan dalam hal itu.

"Mereka hanya memaklumkan perkara ini kepada kami bulan lalu. Mereka memberitahu kami bahawa asrama tersebut yang telah melahirkan ramai golongan pelajar berjaya akan dirobohkan pada 31 Disember ini. "Apabila kami bertanyakan nasib pelajar yang masih menetap di asrama itu, mereka tidak memberi sebarang jaminan penempatan lain. Malah ada juga cadangan supaya pelajar tersebut dihantar pulang dan bersekolah di kampung halaman masing-masing," katanya ketika ditemui *Utusan Malaysia* di pintu masuk asrama itu sini hari ini. Asrama Yayasan Selangor Kuala Lumpur ditubuhkan pada 1979 bertujuan memberi peluang kepada pelajar dari kawasan kampung di Selangor melanjutkan pelajaran di sekolah terpilih sekitar Lembah Klang. Asrama tersebut terdiri daripada Asrama Tun Dr. Ismail yang menempatkan pelajar lelaki manakala Asrama Toh Puan Norashikin menempatkan pelajar perempuan. Kebanyakan mereka dihantar ke Sekolah Menengah Aminuddin Baki, Sekolah Menengah Kebangsaan Victoria, Sekolah Menengah Kebangsaan Convent Bukit Nanas dan Sekolah Menengah Kebangsaan Methodist.

Sementara itu, menurut seorang lagi wakil alumni, Mohammad Khairul Abd. Samad, alasan yang diberikan oleh kerajaan negeri serta pihak yayasan bahawa asrama perlu dirobohkan kerana kawasan persekitaran yang tidak selamat serta mengganggu lalu lintas adalah tidak munasabah. Seorang lagi wakil, Mohd. Raslan Mahmud berkata, pihaknya telah menghantar surat menerusi e-mel kepada Menteri Besar Selangor, Tan Sri Abdul Khalid Ibrahim pada Isnin lalu bagi membantah langkah itu tetapi masih tidak mendapat maklum balas.



4 Ogos 2011 (Khamis)

Ekonomi - Pelan induk KLIFD suku pertama

Oleh AINUL ASNIERA AHSAN ainul.ahsan@utusan.com.my



Gambaran artis projek pembangunan KLIFD.

KUALA LUMPUR 4 Ogos - 1Malaysia Development Bhd. (IMDB) berkata pelan induk terperinci bagi Daerah Kewangan Antarabangsa Kuala Lumpur (KLIFD) bernilai **RM26 bilion** dijangka siap pada suku pertama tahun depan. Ketua Pegawai Operasi IMDB Real Estate Sdn. Bhd., Datuk Azmar Talib berkata, Arkitek Jururancang (M) Sdn. Bhd. (AJM) dan rakan antarabangsanya, Machado Silvetti & Associates (MSA) telah dipilih untuk menyediakan pelan induk tersebut. Beliau berkata: "AJM dan MSA berkongsi satu wawasan inovatif dari segi nilai estetik untuk mewujudkan KLIFD sebagai pusat kewangan pilihan." Katanya, AJM dan MSA berjaya mengenepikan beberapa persaingannya yang turut menyertai pertandingan pencarian bagi perancang induk KLIFD yang diadakan pada tahun lalu. Antara peserta yang bersaing ialah Foster + Partners, Sasaki, BDP, Machado dan Silvetti, Broadway Malyan, Atkins, Cox Richardson, Adrian Smith + Gordon Gill, Nikken Sekkei Ltd. dan OMA.

Kedua-dua syarikat mewakili gabungan bakat-bakat tempatan dan antarabangsa terbaik yang mampu menterjemahkan wawasan 1MDB bagi daerah kewangan masa depan melalui konsep dan persembahan bagi pelan induk, menurut kenyataan 1MDB. Pemilihan dua syarikat itu dibuat selepas 1MDB menganjurkan pertandingan rekaan bagi para perancang induk pada tahun lalu telah menarik penyertaan terbaik dalam perancang induk dunia. Tambah beliau, AJM-MSA komited untuk menghasilkan KLIFD yang mampan dan model serta melaksanakan rekaan antarabangsa peringkat tertinggi. Selain itu, ia turut memberi penekanan perancangan progresif termasuk ketahanan bangunan dan infrastruktur, satu jajahan awam hijau mesra pejalan kaki, rangkaian pengangkutan awam yang meluas dan garis panduan bagi seni bina dengan piawaian antarabangsa. "Kami akan memberi sumbangan sebenar untuk landskap perbandaran Kuala Lumpur, sejarah dengan objektif inisiatif Greater KL untuk menjadikan bandar raya ini bandar berkelas dunia," katanya. Peningkatan kesedaran bandar yang dimanifestasikan dalam Sungai Kehidupan dan pemulihan taman-taman tasik, merupakan tanda menyambut keunikan KLIFD sebagai Pusat Kewangan Dalam Taman, kata Pengarah Urusan AJM, Datuk Seri Esa Mohamed.

5 Ogos 2011 (Jumaat)

Scomi dapat projek monorel RM2.76 bilion di Brazil



Gerabak monorel Scomi yang digunakan di India dalam proses ujian di Kuala Lumpur, baru-baru ini.

KUALA LUMPUR 5 Ogos - Scomi Engineering Bhd. mendapat projek Monorel Manaus di Brazil bernilai kira-kira RM2.76 bilion yang dibida melalui sebuah konsortium. Daripada RM2.76 bilion itu, bahagian Scomi Engineering dalam kontrak ialah kira-kira RM646.38 juta, kata syarikat itu dalam kenyataan kepada Bursa Malaysia hari ini. Syarikat-syarikat lain dalam konsortium itu ialah CR Almeida S/A Engenharia De Obras, Mendes Junior Trading E Engenharia S/A dan Serveng-Civilsan S/A Empresas Associadas De Engenharia. Kontrak berkenaan untuk kerja-kerja reka bentuk, pembuatan, pembekalan dan pelaksanaan sistem monorel untuk laluan monorel sepanjang 20 kilometer untuk bandar raya Manaus. Projek itu yang dijangka siap dalam masa 40 bulan, terdiri daripada sembilan stesen dari Largo da Matriz ke Jorge Teixeira dan akan melibatkan pembekalan 10 set tren yang terdiri daripada enam gerabak setiap set. Menurut syarikat itu, pemberian kontrak itu tidak memberi sebarang kesan terhadap modal saham dan atau struktur pemegangan Scomi Engineering dan atau keputusan kewangan bagi tahun yang berakhir pada 31 Disember 2011.

7 Ogos 2011 (Ahad)

UDA cari rakan bisnes perhotelan

JOHOR BAHRU 7 Ogos - UDA Holdings Berhad sedang berusaha mencari rakan usaha sama untuk memajukan industri perhotelan di lokasi-lokasi baru di seluruh negara, kata Pengurusnya, Datuk Nur Jazlan Mohamed. Menurut beliau, majlis pecah tanah Pembangunan Resort 4 Bintang di Pekan, Pahang bernilai RM80 juta yang disempurnakan oleh Perdana Menteri, Datuk Seri Najib Tun Razak minggu lalu, menjadi teras dalam usaha tersebut. "Usahasama ini diwujudkan kerana tidak banyak syarikat berminat dalam bidang perhotelan disebabkan pulangan daripada pelaburan yang dibuat memakan masa panjang." Keyakinan UDA adalah berdasarkan kejayaan hotel jenama UDA sendiri seperti Ancasa Hotel & Spa yang terletak berdekatan Puduraya," ujarnya. Beliau berkata demikian kepada pemberita selepas Majlis Berbuka Puasa dan Penyerahan Zakat di Projek Perumahan Rakyat Kempas di sini semalam. Terdahulu dalam ucapannya, beliau meluahkan rasa kehilangan selepas pemergian Pemangku Pengarah Urusan UDA, Muhammad Radzi Mohd. Basar yang meninggal dunia akibat serangan jantung sebelum sempat menghadiri majlis pecah tanah projek hotel di tebing Sungai Pahang, hujung minggu lalu.

8 Ogos 2011 (Isnin)

Sistem Pangkalan Data Isu-isu Sosial (SPDIIS) dilancarkan

KUALA LUMPUR 8 Ogos - Maklumat berkaitan isu sosial yang dikendalikan semua agensi dan jabatan di bawah Kementerian Pembangunan Wanita, Keluarga dan Masyarakat akan dikumpul dalam satu pangkalan sistem bagi memudahkan capaian dan rujukan antara jabatan dan agensi. Sistem Pangkalan Data Isu-isu Sosial (SPDIIS) yang kini masih di peringkat pembangunan itu dilancarkan oleh Menterinya, Datuk Seri Shahrizat Abdul Jalil hari ini. "Sekarang kita nak menentukan ada satu pangkalan data supaya senang untuk diakses dan yang mustahak ia akan menjadi satu rujukan kepada polisi dan tindakan yang dijalankan kementerian dan jadi rujukan agensi di bawahnya," katanya kepada media selepas melancarkan sistem itu di sini hari ini.

Shahrizat juga berkata, pembangunan sistem SPDIIS itu adalah salah satu langkah untuk mempertingkatkan lagi pembangunan sosial negara setaraf dengan pembangunan ekonomi negara dalam matlamat mencapai taraf negara maju. Sementara itu, Pengarah Institut Sosial Malaysia (ISM), Prof Dr Mohammed Fadzil Che Din memberitahu, proses pengumpulan data sistem itu kini mencapai 60 peratus dan keseluruhan maklumat dijangka akan dapat dikumpul sepenuhnya sebelum penghujung tahun ini.

9 Ogos 2011 (Selasa)

Rencana- Kemasukan UiTM tidak wajar dikecilkkan

Oleh MOHD. FADZLY MOHD. IZAB pendidikan@utusan.com.my

BANYAK pihak tampil menyuarakan cadangan dan menyatakan usul agar jumlah kemasukan pelajar di Universiti Teknologi Mara (UiTM) dikecilkkan kerana bilangan graduan yang ramai di institut itu pada masa kini merupakan antara penyumbang kepada jumlah pengangguran yang tinggi dalam kalangan graduan lepasan universiti. Atas desakan itu, Naib Canselornya, Profesor Datuk Ir. Dr. Sahol Hamid Abu Bakar tampil memberi jawapan dan menjelaskan kenapa tindakan mengurangkan bilangan pelajar di UiTM adalah sesuatu yang tidak wajar untuk dilakukan. Menurut beliau, perkara ini tidak seharusnya timbul kerana UiTM merupakan universiti yang menyediakan peluang pendidikan terbaik kepada golongan muda dalam usaha untuk melahirkan masyarakat berilmu. "Lambakan jumlah penganggur di kalangan graduan lepasan universiti bukanlah semata-mata berpunca daripada jumlah kemasukan yang besar di universiti ini. "Banyak faktor lain yang menjadi punca permasalahan tersebut dan peluang pekerjaan yang terdapat di negara ini setiap tahun tidak boleh disamakan dengan jumlah graduan yang berjaya menamatkan pengajian mereka," jelasnya kepada *Utusan Malaysia* di UiTM Shah Alam, Selangor baru-baru ini.

Sahol Hamid berkata, peluang pekerjaan yang disediakan dalam sektor kerajaan mampu diukur bilangannya namun peluang pekerjaan dalam masyarakat atau sektor swasta adalah terbuka dan lebih luas. "Oleh itu, para graduan perlu bijak mencari peluang dan menggandakan usaha untuk meneroka kekosongan bagi menempatkan diri mereka dalam bidang pekerjaan," katanya. Sehingga kini dianggarkan seramai 35,000 hingga 40,000 graduan telah berjaya dihasilkan oleh UiTM setiap tahun daripada jumlah kemasukan sebanyak kira-kira 140,000 pelajar. Jumlah kemasukan pelajar di UiTM ini akan ditingkatkan lagi pada masa akan datang selaras dengan wawasan kerajaan untuk mencapai jumlah kemasukan pelajar sehingga 200,000 pada satu-satu masa. Beliau memberitahu, peranan utama universiti adalah untuk memberi ilmu sebagai pengetahuan umum kepada para pelajar dan bukanlah universiti yang dibina untuk menyediakan peluang pekerjaan kepada pelajarnya. "Walaupun syarat untuk mencari kerja adalah keperluan, tetapi hasrat universiti adalah untuk memenuhi tuntutan peningkatan ilmu di kalangan para penuntutnya.

"Peluang itu tidak datang bergolek, ia harus dicari sendiri oleh para graduan dengan berbekalkan segala kemahiran dan ilmu pengetahuan yang telah diperolehi semasa menuntut di universiti. "Malah, peluang pekerjaan ini juga tidak hanya tertumpu di dalam negara, para graduan perlulah berani mencari peluang untuk menimba pengalaman bekerja di luar negara," saran beliau. Pendidikan yang disediakan oleh universiti, ujar Sahol Hamid, sememangnya diakui penting kepada masyarakat sebagai pemangkin untuk meninggikan taraf hidup mereka. "Lebih banyak peluang pendidikan perlu diberikan oleh universiti kepada golongan muda ini supaya mereka akan menjadi warganegara dan ahli masyarakat yang terpelajar. "Pelbagai perkara dapat dimanfaatkan dengan adanya ilmu pengetahuan yang mencukupi dalam diri seseorang itu contohnya seperti bekerja sendiri atau menjadi usahawan," katanya. Tambah beliau, universiti-universiti lain juga perlu menyediakan lebih banyak peluang kepada para pelajar untuk melanjutkan pengajian ke institusi pengajian tinggi.

"Hal ini kerana, negara akan maju dengan adanya masyarakat berilmu lebih-lebih lagi dalam dunia teknologi komunikasi dan maklumat (ICT) masa kini di mana ilmu adalah satu keperluan yang sangat penting bagi setiap orang. "Pendedahan ilmu ICT dapat diperolehi semasa pembelajaran di universiti dan adalah sukar atau terbatas untuk menguasai kepentingan ilmu ini jika mereka tidak melanjutkan pengajian ke peringkat yang lebih tinggi," katanya. Menurut beliau, dalam isu kebolehpasaran graduan pula, kira-kira 80 peratus graduan UiTM berjaya mendapat kerja dalam tempoh enam bulan selepas tamat pengajian mereka. "Antara faktor yang menyumbang kepada kebolehpasaran graduan UiTM ialah seperti penawaran kursus-kursus yang lebih menepati keperluan industri, profesional dan menarik. "UiTM juga sentiasa mengkaji dan memperbaharui dari segi tawaran kursus-kursus kepada para pelajar supaya ia terus kekal relevan dengan keperluan semasa," jelas beliau. Selain itu tambahnya, pihak universiti turut menyediakan latihan dari segi kebolehan individu selain penggunaan bahasa Inggeris, penerapan kemahiran insaniah (*soft skill*) yang tinggi, serta keseimbangan pembelajaran dari segi teori dan praktikal. "UiTM turut menerima ramai pensyarah daripada industri untuk menjadi tenaga pengajar dan para pensyarah yang bukan dari industri pula akan diberi peluang menjalani latihan industri bagi memantapkan lagi mutu pengajaran mereka," ujarnya lagi.

10 Ogos 2011 (Rabu)

Najib umum RM53.4 juta biayai pelajar

PUTRAJAYA 10 Ogos - Perbadanan Tabung Pendidikan Tinggi Nasional (PTPTN) memperuntukkan RM53.4 juta sebagai wang pendahuluan pembiayaan kepada 35,664 pelajar yang akan memasuki institusi pengajian tinggi (IPT) tempatan bermula 3 September depan, kata Datuk Seri Najib Tun Razak. Perdana Menteri berkata, semua pelajar yang layak akan menerima wang sebanyak RM1,500 seorang, dua minggu sebelum tarikh pendaftaran kemasukan ke IPT. "Ini adalah salah satu usaha yang mana selaras dengan prinsip pendemokrasian pendidikan. Percayalah, kerajaan akan terus membantu golongan muda kerana mereka adalah harapan negara dan kita akan melakukan yang terbaik untuk menjamin masa depan golongan belia," katanya hari ini. Najib yang juga Menteri Kewangan berkata, bantuan itu diberikan kepada pelajar yang keluarga mereka berpendapatan tidak melebihi RM4,000 sebulan dan yang belum pernah mendapat pembiayaan PTPTN sebelum ini.

10 Ogos 2011 (Rabu)

IBM: Perkomputeran awan tempatan di peringkat awal

KUALA LUMPUR 10 Ogos - Pasaran perkomputeran awan Malaysia yang masih pada peringkat permulaan, akan menyaksikan pelaksanaan teknologi itu dalam kalangan syarikat-syarikat tempatan dalam tiga tahun akan datang, kata IBM Malaysia. Ketua Negara bagi Perkomputeran Awan, Ku Chuan Cherng berkata, minat akan semakin meningkat di kalangan perusahaan Malaysia untuk menggunakan perkomputeran awan pada masa akan datang memandangkan kos, tekanan persaingan dalam perniagaan dan pengharapan pengguna yang semakin tinggi. "Kita berada pada titik permulaan penerimaan pakai yang memberikan peluang-peluang yang banyak untuk berkembang meskipun memang ada beberapa syarikat yang telah terlebih dahulu menerima pakai perkomputeran awan. "Kami menjangka dapat menyaksikan kadar penerimaan yang pesat, meskipun kebanyakan syarikat menganggap perkomputeran awan sebagai lanjutan kepada apa yang telah mereka lakukan hari ini," katanya dalam satu temu bual. Perusahaan tempatan yang menerima pakai perkomputeran awan akan dapat melaksanakan IT tanpa sempadan, meningkatkan kelajuan dan kecekapan, mencipta nilai baharu perniagaan dan menjimatkan kos. Bagaimanapun, katanya, keimbangan tentang keselamatan, kerahsiaan, perubahan cara-cara menghasilkan perkhidmatan IT dan kawalan data, terus menghalang penerimaan pakai.

"Justeru itu, kebanyakan perniagaan perlu mengatasi kebimbangan ini dengan memahami potensi perkembaran awan dan bagaimana mereka boleh memanfaatkannya untuk mencipta semula perniagaan mereka," tegas Ku. Syarikat-syarikat sekarang menghadapi tekanan seperti pergerakan tenaga kerja dan usaha meningkatkan produktiviti, disebabkan oleh anjakan dalam ekonomi, persekitaran perniagaan atau perilaku pengguna, yang semakin menuntut penggunaan sistem teknologi/IT. Perkembaran awan telah membuka peluang-peluang yang luas bagi syarikat sebagai satu platform bagi inovasi dan pertumbuhan perniagaan. Ini bukan hanya tentang sistem IT yang semakin maju, tetapi adalah juga tentang mencipta semula perniagaan," jelasnya.

10 Ogos 2011 (Rabu)

Impak lebih teruk jika meleset?



Ketika dalam kemelesetan, emas menjadi satu bentuk pelaburan lebih menarik kerana dianggap selamat dan bernilai tinggi.

SINGAPURA 10 Ogos - Ekonomi Asia yang masih lagi merasai keperitan kesan kemelesetan ekonomi global pada 2008 mungkin terpaksa bergelut dengan situasi yang lebih teruk daripada tiga tahun lalu, menurut penganalisis serantau.

Kebimbangan akan berlaku kemelesetan ekonomi sekali lagi semakin memuncak selepas penarafan kredit Amerika Syarikat (AS) diturunkan buat kali pertama dan pasaran menjunam seperti yang dijangkakan. Itali dan Sepanyol pula dijangka akan 'menyertai' negara-negara Eropah yang lain bagi mencari bantuan kewangan. "Pada 2008, hutang lapuk di bank-bank merupakan masalah utamanya. "Kerajaan-kerajaan berhutang dengan bank-bank dan berbelanja banyak wang untuk ekonomi dan sekarang mereka terpaksa menanggungnya. "Sebab itu keadaan semakin teruk berbanding sebelum ini dan tiada siapa dapat menolong mengatasinya," menurut Bank DBS. Perbelanjaan rangsangan semasa krisis 2008 oleh sembilan ekonomi Asia Timur termasuk China dan Jepun ekoran bergantung kepada permintaan AS dan Eropah berjumlah AS\$1.3 trillion (RM3.9 trillion), menurut anggaran Bank Pembangunan Asia. Rizab Persekutuan AS telah menyuntik lebih AS\$1 trillion dolar dalam ekonomi selepas krisis 2008 dan menambah lebih AS\$600 bilion (RM1.8 trillion) pada 2010. Rizab Singapura negara terkaya di Asia susut buat kali pertama 2009 apabila ekonomi negara itu mengalami kemelesetan teruk sejak kemerdekaan, sebelum kembali kukuh dan berkembang sebanyak 14.5 peratus pada 2010.

Kejatuhan pasaran saham Asia Isnin lalu menyebabkan Singapura menyemak semula pertumbuhan ekonomi 2011 daripada lima hingga tujuh peratus kepada lima hingga enam peratus disebabkan ketidaktentuan dalam unjuran global. Standard & Poor pula berkata, kapasiti fiskal bagi Jepun, India, Malaysia, Taiwan dan New Zealand telah merosot kepada tahap pra 2008. "Sekiranya keadaan semakin terjejas, ia boleh menyebabkan impak lebih teruk berbanding sebelum ini," kata agensi itu. Sistem kewangan serantau mungkin berhadapan dengan pengurangan kecairan dan meningkatkan risiko pembiayaan semula dalam tempoh sederhana memandangkan kos pinjaman bertambah. Asia akan mengalami kesan pelbagai tahap memandangkan kerajaan-kerajaan dipaksa untuk menggunakan imbalan kira-kira bagi menyokong sektor kewangan, tambah S&P. "Implikasi bagi kebolehpercayaan berdaulat di Asia Pasifik akan menjadi negatif berbanding pengalaman sebelumnya dan lebih banyak tindakan penarafan negatif akan mengikut," katanya. DBS berkata, apabila para pelabur mula 'menghidu' kerajaan-kerajaan juga berada dalam situasikekangan seperti mereka, emas mula menjadi lebih menarik. "Dan kesan kepada ekonomi sebenar, seperti 2008/09, boleh menjadi dramatik," tambahnya.

Bagaimanapun, Ketua Ekonomi Asia Pasifik IHS Global Insight, Rajiv Biswas masih mengekalkan pendapatnya bahawa bank-bank pusat di rantau ini bersedia untuk berhadapan dengan krisis lain, hasil pengalaman 2008. Menurut beliau, bank-bank pusat di rantau ini telah membangunkan mekanisme sokongan lebih kuat untuk memastikan kestabilan sistem kewangan dan peruntukan sokongan instrumen kecairan dalam institusi-institusi kewangan. "Kali ini, mekanisme masih digunakan dan bank-bank pusat lebih banyak pengalaman untuk menangani masalah berkaitan kecairan dalam sistem kewangan mereka," tambah Biswas. Pengukuhan berterusan ekonomi China dan Jepun boleh mengekang kesan krisis hutang di AS dan Eropah kepada Asia, ujarnya. - AFP.

10 Ogos 2011 (Rabu)

Bajet 2012 tumpu kos hidup

Oleh MOHD. KHUZAIRI ISMAIL pengarang@utusan.com.my

KUALA LUMPUR 10 Ogos – Datuk Seri Najib Tun Razak berkata, Bajet 2012 yang akan dibentangkan nanti akan memberi tumpuan kepada pengurusan kos hidup rakyat. Kata Perdana Menteri, kerajaan akan merangka strategi terbaik untuk mengurangkan beban kos hidup rakyat menerusi bajet itu serta dalam masa sama menguruskan pembangunan ekonomi negara. "Kerajaan akan bekerja keras dalam memastikan keresahan rakyat berhubung kos kehidupan berjaya diatasi di tengah-tengah cabaran global yang sukar ini," katanya menerusi entri terbaru bertajuk 'Time to Tackle Rising Cost of Living' seperti yang tersiar di laman blog beliau di <http://www.1malaysia.com.my> hari ini. Najib menambah, adalah menjadi tanggungjawab kerajaan untuk melakukan apa sahaja dalam menguruskan peningkatan kos hidup dan mencari jalan memperlahankan kesannya kepada rakyat. Kata beliau, kerajaan juga akan terus menyediakan subsidi bagi mengurangkan beban rakyat antaranya seperti pemberian subsidi minyak, makanan, bil perubatan dan sebagainya.

"Ini juga adalah antara sebab mengapa kerajaan memperkenalkan Bidang Keberhasilan Utama Negara (NKRA) baru dan ketujuh iaitu Perangi Kos Kehidupan baru-baru ini," katanya. Najib menambah, kerajaan akan meneliti kaedah untuk meningkatkan rantai bekalan pertanian bagi memastikan bekalan makanan yang hilang sepanjang proses penghasilan dan pembekalan dapat dikurangkan. Kerajaan juga, kata beliau, akan meneruskan sistem kawalan harga barang dan menguruskan subsidi dengan bijak yang mana merupakan antara subsidi tertinggi diberikan di sesebuah negara. "Di samping itu, kerajaan akan memperluaskan lagi inisiatif berfokuskan rakyat seperti Klinik 1Malaysia, Kedai Rakyat 1Malaysia dan yang terbaru, Menu Rakyat 1Malaysia iaitu program yang menggalakkan syarikat pengeluar makanan memperkenalkan pakej menu sarapan pagi serendah RM2 dan makanan tengah hari RM4 di restoran-restoran yang mengambil bahagian," katanya. Tambah Najib, peningkatan kos hidup tidak hanya dialami oleh rakyat negara ini memandangkan ia merupakan fenomena global yang disebabkan oleh kenaikan harga minyak mentah dunia terutama pada 2007 dan 2008. Keadaan itu, kata beliau, diburukkan lagi dengan perubahan iklim dunia yang tidak menentu menyebabkan berlakunya banjir dan kemarau termasuk di negara-negara pengeluar makanan utama dunia.

11 Ogos 2011 (Khamis)

Ekonomi- MRT: 28 disenarai pendek

KUALA LUMPUR 11 Ogos - Syarikat Prasarana Negara Bhd. (Prasarana) telah menyenarai pendek 28 syarikat individu dan usaha sama yang layak membida bagi pelbagai pakej kerja sivil bahagian atas, pembinaan stesen dan depot di bawah projek prasarana My Rapid Transit (MRT) yang bernilai berbilion ringgit.

Prasarana dalam kenyataannya di sini hari ini berkata, tender-tender itu terdiri daripada pakej kerja sivil bahagian atas (lapan pakej), stesen (lapan pakej) dan depot (dua pakej) akan ditawarkan secara berperingkat, bermula bulan depan sehingga Disember 2012. "Tender bagi peringkat pertama, yang melibatkan dua pakej kerja sivil akan dikeluarkan awal bulan depan," kata Pengarah Urusan Kumpulan Prasarana, Shahril Mokhtar. Beliau berkata, dua pakej itu ialah laluan 5.4 kilometer (km) dari Taman Bukit Ria ke Plaza Phoenix di Cheras dan satu lagi laluan sejauh 5.2 km dari Taman Suntex ke Bandar Tun Hussein Onn. Shahril berkata, 18 pakej kerja itu dibahagikan kepada dua kategori — terbuka dan Bumiputera — dan pemohon dinilai berdasarkan beberapa aspek, termasuk keupayaan kewangan, rekod prestasi, pengalaman dan kesihatan dan amalan alam sekitar. Bagi permohonan usaha sama, beliau berkata penilaian teknikal dan kewangan dijalankan ke atas syarikat individu, dengan jumlah skor mata kewangan dan teknikal mereka digabungkan berdasarkan kepada peratusan ekuiti mereka.

Beliau berkata, sebuah 28 syarikat yang disenarai pendek itu dipilih daripada 195 yang menyerahkan permohonan, selepas dua iklan awam disiarkan. Antara syarikat yang disenarai pendek bagi semua tiga jenis pakej itu (kerja sivil bahagian atas, stesen dan depot) dalam kategori terbuka ialah Sunway Construction Sdn. Bhd., Muhibbah Engineering (M) Sdn. Bhd., IJM Construction Sdn. Bhd., Gadang Engineering (M) Sdn. Bhd. dan Loh & Loh Construction Sdn. Bhd., katanya. Sementara itu, dalam kategori Bumiputera ialah Naim Engineering Sdn. Bhd., Trans Resources Corporation Sdn. Bhd., TSR Bina Sdn. Bhd., Ahmad Zaki Sdn. Bhd., HRA Teguh Sdn. Bhd. dan Syarikat Muhibah Perniagaan & Pembinaan Sdn Bhd. Tender-tender bagi pakej kerja lain akan diumumkan pada masa yang sesuai. MRT itu yang dianggap projek prasarana terbesar negara sebagai sebahagian daripada Pelan Induk Greater Lembah Klang, akan menyediakan perkhidmatan tulang belakang kepada sistem pengangkutan awam sedia ada, dan disepadukan dengan LRT, KL Monorel dan perkhidmatan KTM sedia ada. Merentasi pusat bandar dari Sungai Buloh ke Kajang, MRT baru itu akan mempunyai jarak kira-kira 51 km. Ini termasuk 9.5 km menerusi terowong bawah tanah dengan 27 stesen bahagian atas, tujuh stesen bawah tanah dan depot di Sungai Buloh dan Kajang.

12 Ogos 2011 (Jumaat)

MRT: Kontraktor tersenarai awam lebih berpeluang

KUALA LUMPUR 12 Ogos — Syarikat-syarikat atau kontraktor tersenarai awam berkemungkinan mempunyai peluang yang lebih baik untuk memperoleh kontrak bagi projek My Rapid Transit (MRT), demikian menurut OSK Research. Ini mungkin berlaku memandangkan kewangan mereka yang kukuh dan pengalaman dengan projek skala lebih besar. Pada Khamis, Syarikat Prasarana Negara Bhd. menyenarai pendek 28 syarikat individu dan usaha sama yang layak untuk membida bagi pelbagai pakej kerja sivil bahagian atas, pembinaan stesen dan depot bagi projek MRT. "Secara keseluruhan, 14 daripada 28 nama-nama pralayak merupakan kontraktor tersenarai," kata firma itu dalam satu kenyataan hari ini. Terdapat 18 pakej kerja dengan lapan daripadanya kerja sivil bahagian atas, lapan lagi kerja stesen di bahagian atas dan pakej untuk depot, dengan kerja-kerja ini dibahagikan kepada dua kategori iaitu terbuka dan Bumiputera. Berdasarkan kepada kerja bahagian atas, dianggarkan bernilai RM12 bilion dan setiap pakej sehingga RM667 juta. "Kami berpendapat kerja-kerja sivil bahagian atas akan merupakan pakej terbesar diikuti dengan stesen dan depot. "Dengan 18 pakej bagi 28 nama pra-layak, bahagiannya cukup besar untuk direbut sebahagiannya dengan setiap satu pada peluang 64 peratus," kata OSK Research. Dalam perkembangan berkaitan, OSK Research berkata, pada peringkat permulaan ini, adalah masih terlalu awal untuk menentukan pihak yang mungkin mendapat projek itu. Bagaimanapun, firma penyelidikan itu berkata, Trans Resources Corporation Sdn. Bhd. mempunyai kelebihan dalam bahagian Bumiputera bagi ketiga-tiga kategori, memandangkan rekod prestasinya dengan projek penyambungan Kelana LRT-A. "Fajarbaru Builders Sdn. Bhd. dan Pembinaan Mitrajaya Sdn. Bhd. boleh memanfaatkan rekod prestasi stesen mereka juga dengan LRT-A.

"Bagi depot pula, bahagian terbuka RM24 juta diberikan kepada Gadang," kata OSK Research dan menambah yang kontraktor seperti IJM Construction Sdn. Bhd., Mudajaya Corporation dan MRCB Engineering Sdn. Bhd., melakukan beberapa kerja laluan LRT sedia ada (bukan sambungan), rekod prestasi mereka akan berguna. Menurut firma penyelidikan itu, dengan tender akan dipanggil pada September, dijangka anugerah pertama kontrak akan dikeluarkan pada Disember.

12 Ogos 2011 (Jumaat)

ECER dapat pelaburan bioteknologi RM2 bilion

PUTRAJAYA 12 Ogos – Malaysia mendapat satu pelaburan **bioteknologi perindustrian RM2 bilion di Wilayah Ekonomi Pantai Timur** (ECER) apabila CJ Cheiljedang Corporation dari Korea Selatan dan Arkema SA dari Perancis hari ini mengumumkan penubuhan satu loji bio-metionina yang pertama di dunia dan platform tiokimia yang pertama di Asia di Zon Ekonomi Khas ECER (SEZ), Taman Polimer Kertih, Terengganu. Perdana Menteri, Datuk Seri Najib Tun Abdul Razak yang menyaksikan pengumuman itu berkata, projek itu dijangka menjana kesan limpahan yang signifikan dan menggalakkan aktiviti ekonomi baharu seperti penjanaan wap menggunakan sumber diperbarui. Najib berkata, projek itu dijangka menjana kira-kira RM20 bilion di segi jualan kumulatif menjelang 2020 dan menyediakan peluang pekerjaan yang besar kepada hampir 500 pekerja berpengetahuan tempatan.

"Projek itu akan menjadi rangsangan yang signifikan kepada ECER dan khususnya SEZ itu," kata Najib pada majlis pengumuman antara CJ-Arkema, Perbadanan Bioteknologi Malaysia (BiotechCorp) dan Majlis Pembangunan ECER (ECERDC). BiotechCorp dan ECERDC adalah pencadang utama projek itu. CJ Cheiljedang adalah peneraju pengeluar produk berasaskan penapaian seperti asid amina makanan, monosodium glutamat dan nukleotida dengan mempunyai operasi pengeluaran dan perniagaan global di enam benua manakala Arkema adalah syarikat kimia global dan peneraju pengeluar kimia Perancis. Loji pengeluaran 80,000 tan metrik bio-metionina dan platform tiokimia itu akan dibina di atas tapak seluas 70 hektar pada tahun depan dan akan beroperasi pada 2013.



13 Ogos 2011 (Sabtu)

Rencana - Di sebalik makna Perlembagaan

Oleh IKBAL SALAM Penulis ialah Peguam bela & Peguam cara di Johor Bahru

Setiap kali berlaku kejadian dan usaha untuk memesongkan akidah umat Islam dan seterusnya menghakis martabat sebagai agama Persekutuan sebagaimana yang berlaku di Gereja Methodist, Damansara Utama pada 3 Ogos 2011, tindakan umat Islam bukanlah sesuatu yang sukar untuk dijangkakan. Ada yang berdemonstrasi dalam jumlah yang kecil, parti-parti politik Melayu/Islam sibuk menyalahkan satu sama lain dan cuba memperoleh manfaat politik daripadanya dan ada juga yang menyerahkan memorandum kepada pihak-pihak tertentu dengan merujuk kepada frasa-frasa tertentu dalam Perlembagaan Persekutuan sebagai manifestasi ketidakpuasan hati mereka terhadap pihak tersebut. Kemuncak daripada tindakan itu, mereka akan mengadu pula kepada Tuanku Sultan untuk mempertahankan ketertinggian dan kesucian agama Islam. Sedar atau tidak umat Islam tidak lagi boleh selama-lamanya terlalu bergantung kepada perlindungan atau papahan undang-undang untuk mempertahankan mereka.

Tanpa mendakkan keperluan kita memartabatkan dan meletakkan undang-undang negara pada tempat yang tinggi, kadang-kadang pergantungan yang keterlaluan pada perlindungan itu akan menyebabkan umat Islam dan bangsa Melayu kelihatannya menjadi umat yang begitu lemah dan tidak bermaya. Dalam kes tuntutan kalimah Allah oleh agama Kristian sedikit masa dahulu, hasrat kita untuk mendapatkan perlindungan dengan merujuk kepada Enakmen Pengawalan Agama Islam Negeri-Negeri dan keputusan Kabinet yang melarang penggunaan kalimah tertentu yang selama ini dianggap eksklusif untuk umat Islam jelas tidak menjadi kenyataan. Mahkamah Tinggi Kuala Lumpur dalam kes tersebut membenarkan permohonan pihak gereja Roman Katholik untuk menggunakan Kalimah Allah. Kita tidak punya banyak pilihan selain keluar segera dari kepompong mentaliti bergantung kepada perlindungan undang-undang dan bangkit bergerak sebagai satu umat yang dirasakan kehadirannya. Untuk renungan kedudukan Islam sebagai agama rasmi yang telah wujud lama sebelum merdeka telah diiktiraf di dalam Perlembagaan dan ini memberikan hak kepada agama Islam untuk diberikan keistimewaan mengatasi agama lain.

Peruntukan undang-undang memberikan pengiktirafan kepada agama Islam hingga sesiapa yang didapati menyebarkan agama lain kepada orang Islam boleh dikenakan hukuman atas kesalahan jenayah. Bagaimanapun pada hari ini, penggunaan kalimah yang dulunya eksklusif milik orang Islam dan pelbagai dakyah bagi memesangkan akidah umat Islam menggunakan teknologi maklumat yang canggih boleh sahaja dibaca oleh anak-anak kita dengan membuka komputer di dalam rumah dan tidak lagi mampu disekat oleh peruntukan undang-undang yang ada. Di hujung jari anak-anak kita pada hari ini, mereka boleh membuka pelbagai perakuan daripada rakyat Malaysia yang murtad dengan pelbagai tohmahan dan kejian terhadap agama Islam. Tidaklah lagi menghairankan apabila lagu *Allahuakbar* dan *Alhamdulillah* telah boleh dinyanyikan di gereja-gereja bagi menyerapkan kalimah Allah dengan agama mereka. Lebih daripada itu banyak peruntukan undang-undang dan Perlembagaan Persekutuan kini diterjemahkan dalam konteks yang diterbalikkan hingga apabila Perkara 3(1) dalam Perlembagaan berkaitan peruntukan agama Islam sebagai agama Persekutuan disebut, maka peruntukan berkaitan kebebasan kepada semua orang untuk mengamalkan agama mereka sendiri juga adalah dijamin.

Ia kelihatannya menjadi lebih dominan dan penting pula sehingga pihak agama lain itu boleh pula melepassi batasan yang digaris panduan oleh peruntukan Perlembagaan. Hujah kebebasan beragama inilah yang digunakan untuk menghalalkan tindakan mereka menyebarkan dakyah agama kepada umat Islam. Bible telah dicetak dan boleh dibaca dalam bahasa Melayu, kalimah Allah telah mula digunakan, bantuan-bantuan kebajikan sering kali tiba lebih awal dan mewah daripada bantuan Majlis Agama Islam Negeri dan mereka menggambarkan agama mereka sebagai agama yang begitu mudah dan relevan untuk zaman ini. Perlindungan terhadap undang-undang dalam kes yang dikendalikan pihak Jabatan Agama Islam Selangor (JAIS) boleh menjadikan umat Islam dihamparkan sekali lagi apabila tindakan JAIS memanggil 12 orang saksi beragama Islam dalam kes tersebut dijawab dengan pelbagai notis daripada para peguam bagi mendakkan kuasa JAIS memanggil saksi-saksi tersebut. Sebagaimana kesukaran dalam menangani isu murtad, pihak berkuasa agama akan menghadapi pelbagai halangan bagi membuat pendakwaan terhadap pihak-pihak terbabit.

Ironinya, jika pendakwaan yang dibuat terhadap orang Islam pun kelihatannya begitu sukar, apatah lagi jika pendakwaan itu hendak dilakukan terhadap orang bukan Islam yang menyebarkan dakyah agama mereka terhadap orang Islam. Lebih mengaibkan pasca tindakan JAIS terhadap gereja tersebut, terdapat pula permohonan maaf daripada pihak berkuasa di Negeri Selangor terhadap gereja tersebut. Apa sudah jadi dengan umat Islam di negara kita. Umat Islam jelas tidak lagi boleh menggunakan skrip lapuk bagi mempertahankan agama Islam. Demonstrasi dengan jeritan sekadar 2-3 kerat yang hadir, memorandum atau kutukan tidak menghadirkan apa-apa impak kepada pihak gereja. Perlu diakui bahawa perlindungan undang-undang hanya boleh melindungi umat Islam pada satu tahap sahaja.

Apabila serangan dan gerakan itu menjadi begitu meluas, perlindungan itu akan akhirnya jatuh juga menyembah bumi. Perlindungan undang-undang juga membawa erti kebergantungan yang keterlaluan terhadap agensi atau jabatan kerajaan sahaja. Tanpa mendakkan usaha-usaha yang telah agensi ini lakukan, kita juga hendaklah mengakui bahawa sebahagian besar penggerak agama Islam pada hari ini adalah mereka yang makan gaji sedangkan gerakan agama lain didukungi dan dilaksanakan dengan sepenuh jiwa secara sukarela oleh badan-badan dan organisasi NGO mereka. Tidak ada gunanya juga kita asyik menyalahkan gereja-gereja atas usaha yang dilakukan oleh mubaligh mereka. Lihatlah sahaja bagaimana mereka berjaya mengumpulkan anak-anak pelbagai bangsa untuk menghadiri kelas-kelas tuisyen, pengijazahan kelas-kelas tadika di dalam gereja mereka. Mereka hadir tepat pada waktu yang diperlukan oleh golongan yang memerlukan dengan membawa imej yang begitu segar dan lembut.

Sampai bila kita harus berasa takut, bersembunyi dan berlindung di sebalik perlindungan pelbagai undang-undang seolah-olah kita ini adalah umat atau bangsa yang cacat atau kurang vitamin hingga kita perlu sahaja setiap masa dipapah untuk mendepani gerakan mereka. Para profesional, ahli korporat, ulama, ilmuwan, anggota perkhidmatan awam dan setiap individu Muslim seolah-olah berada dalam zon beku tahap maksimum hingga tidak langsung boleh bergerak untuk menyusun gerakan dakwah yang lebih segar bagi menyaingi gerakan yang dibuat oleh pihak gereja. Akhirnya kita mengambil jalan mudah bagi mengatasi kelemahan dan kebejatan pemikiran kita dengan menyerahkan semuanya di bawah bebanan Jabatan Kerajaan, Majlis Agama dan akhirnya berlindung di bawah kuasa Tuanku Sultan. Gerakan mempertahankan dan menyebarkan agama Islam dan hak-hak orang Melayu sambil meraikan hak-hak agama lain dalam negara majmuk hendaklah dibuat dengan lebih terancang, boleh dijawai dan tersusun oleh setiap organisasi Muslim.

16 Ogos 2011 (Selasa)

Empat projek berjaya disiapkan

Oleh SITI MAISARAH SHEIKH RAHIM pengarang@utusan.com.my



MOHD. Shafie Apdal bersama Timbalannya, Datuk Hasan Malek (kirinya) dan para pegawai tinggi kementeriannya termasuk Ketua Setiausaha kementerian, Datuk Ibrahim Muhamad (empat dari kiri) menunjukkan isyarat bagus di majlis prapelancaran Karnival Usahawan Desa 2011, di Bangi, semalam.

KUALA LUMPUR 16 Ogos – Pencapaian Bidang Keberhasilan Utama Negara (NKRA) bagi Infrastruktur Asas Luar Bandar telah mencapai sasarannya apabila kesemua empat projek bagi pembangunan infrastruktur itu berjaya disiapkan mengikut jadual. **Menteri Kemajuan Luar Bandar dan Wilayah, Datuk Seri Mohd. Shafie Apdal** berkata, sehingga Julai lalu, sejumlah 1,298.7 kilometer jalan telah dibina untuk projek pembinaan jalan luar bandar di seluruh negara. Katanya, sebanyak 49,908 rumah pula telah disalurkan bekalan air bersih manakala 31,809 kediaman telah dibekalkan kemudahan elektrik. “Bagi Program Bantuan Rumah, sejumlah 20,324 rumah telah siap dibina dan dibaik pulih di bawah Program Bantuan Rumah. “Pencapaian ini membuktikan kita berjaya menepati sasaran walaupun berdepan dengan masalah cuaca atau bekalan tetapi ia dapat diatasi dengan baik oleh jawatankuasa khas pemantau yang sentiasa turun padang. “Justeru itu, kita yakin dapat membina dan melakukan apa yang disasarkan Perdana Menteri,” katanya. Beliau berkata demikian kepada pemberita selepas merasmikan perhimpunan bulanan Kementerian Kemajuan Luar Bandar dan Wilayah serta prapelancaran Karnival Usahawan Desa 2011, di Bangi dekat sini hari ini.

Sasaran utama NKRA bagi Infrastruktur Asas Luar Bandar bagi perancangan tiga tahun (2010-2012) ialah untuk membina dan menaik taraf 7,000 kilometer jalan raya, bekalan air bersih untuk lebih 360,000 isi rumah, elektrik kepada lebih 140,000 isi rumah dan 50,000 rumah baru atau dipulihkan untuk golongan miskin serta miskin tegar. Bagi tahun ini sahaja, sasaran ditetapkan untuk membina dan menaik taraf tambahan 905 kilometer jalan raya, air bersih untuk 58,087 isi rumah, bekalan elektrik kepada 32,242 isi rumah serta pemulihan atau pembinaan 9,146 buah rumah baru. Dalam pada itu, Mohd. Shafie berkata, kementerian telah berjaya menyelesaikan 98.2 peratus daripada 855 permohonan dan aduan yang diterima pasukan 'Flying Squad' berkenaan program bantuan.

16 Ogos 2011 (Selasa)

Isu walet: Kementerian Pertanian tidak pernah lantik wakil

PUTRAJAYA 16 Ogos - Kementerian Pertanian dan Industri Asas Tani tidak pernah melantik mana-mana syarikat luar untuk menjadi wakil kerajaan dalam memberi penerangan mengenai masalah eksport burung walet tempatan ke China. Menterinya, Datuk Seri Noh Omar berkata, pihaknya langsung tidak tahu-menahu mengenai pelantikan syarikat luar untuk memberi sebarang penerangan berkaitan isu tersebut. Sehubungan itu, beliau berkata, siasatan akan dijalankan untuk mengenal pasti masalah tersebut bagi mengelakkan berlakunya kekeliruan. "Masalah larangan itu timbul disebabkan tindakan segelintir pengusaha tempatan yang mengeksport sarang burung walet yang tidak berkualiti secara rahsia ke China. "Sarang burung walet yang akan dieksport ke luar negara sepatutnya mempunyai sijil Tanda Kesihatan Veterinar (VHM) daripada pihak kementerian bagi memastikan ia melepas piawaian kandungan nitrat yang ditetapkan," katanya.

Beliau diminta mengulas perkara itu selepas menyaksikan Majlis Menandatangani Memorandum Persefahaman (MoU) antara Majlis Latihan Pertanian Kebangsaan (NATC) dengan Institut Skill-tech (IST) di sini, hari ini. Baru-baru ini, media melaporkan mengenai tindakan China melarang kemasukan eksport sarang burung walet ke negara Tembok Besar itu. Terdahulu, majlis itu turut menyaksikan MoU mengenai pelaksanaan sekolah pemasaran di antara Lembaga Pemasaran Pertanian Persekutuan (FAMA), Lembaga Pertubuhan Peladang (LPP) dan NATC. Noh berkata, beliau dan wakil kementerian akan ke Shanghai untuk memperjelaskan isu tersebut dan membuat pertemuan bilateral mengenai perkara itu pada awal bulan depan. Sementara itu, beliau berkata, MoU antara NATC, FAMA dan LPP adalah persefahaman bagi menggunakan Institut Pengurusan Peladang (IPP) di Sungai Petani, Kedah sebagai sekolah pemasaran melalui strategi laut biru. "Melalui konsep persefahaman ini, NATC akan membayai kos latihan kemahiran pertanian, FAMA pula menyumbang tenaga pakar dan IPP melalui LPP akan membenarkan bangunannya digunakan sebagai sekolah pemasaran. "Sekolah pemasaran ini bakal memberi pendedahan kepada para pelajar mengenai latihan aspek pengurusan perniagaan dan pemasaran produk pertanian serta industri asas tani," katanya. Beliau menjelaskan, buat permulaan sekolah pemasaran itu telah menerima 53 pelatih bagi pengambilan pertamanya Jun lalu.

18 Ogos 2011 (Khamis)

6,000 guru prasekolah dilatih 2012

KUALA LUMPUR 18 Ogos - Seramai 6,000 guru prasekolah akan dilatih pada tahun depan bagi merealisasikan hasrat kerajaan menjadikan taman asuhan kanak-kanak dan prasekolah di negara ini bertaraf dunia. Timbalan Perdana Menteri, Tan Sri Muhyiddin Yassin berkata, jumlah tersebut adalah tambahan kepada 14,000 guru prasekolah sedia ada, yang telah diberi latihan sejak setahun lalu melibatkan kos RM39.5 juta.

Menurutnya, daripada sejumlah 14,000 guru prasekolah tersebut, seramai 6,580 dilatih pada 2010 yang melibatkan kos RM19 juta manakala baki 7,420 guru dilatih pada tahun ini dengan kos RM20.5 juta. "Kemudahan fizikal yang canggih semata-mata tidak memberi jaminan ke arah merealisasikan impian kita untuk menjadikan taman asuhan kanak-kanak dan prasekolah mencapai tahap kelas pertama dan bertaraf dunia. "Kita sebaliknya memerlukan pengasuh dan guru prasekolah yang berkualiti. Tenaga pengajar ini mesti berpengetahuan, berkemahiran, mempunyai sifat pengasih serta memiliki minda terbuka," katanya. Beliau berucap merasmikan Majlis Pengasuhan dan Pendidikan Awal Kanak-Kanak Malaysia (ECCE) di Auditorium Suruhanjaya Sekuriti Malaysia (SSM) di sini hari ini. Hadir sama Menteri di Pejabat Ketua Menteri Sarawak, Datin Fatimah Abdullah dan Ketua Pegawai Eksekutif SSM, Datuk Azmi Ariffin. Dalam pada itu, Muhyiddin yang juga Menteri Pelajaran berkata, kerajaan sedang mengkaji untuk mewujudkan satu skim khas bagi membantu kanak-kanak daripada keluarga miskin mengikuti kelas taska dan prasekolah swasta. Bagaimanapun katanya, ketika ini bantuan khas RM150 sebulan untuk setiap kanak-kanak memang sudah diberi kepada setiap keluarga miskin yang menghantar anak mereka ke kelas taska dan prasekolah swasta. "Kita berharap skim khas yang sedang dikaji ini bukan sahaja mampu memberi manfaat kepada kanak-kanak daripada keluarga miskin tetapi turut meringankan beban keluarga yang berpendapatan sederhana rendah," katanya.

18 Ogos 2011 (Khamis)

Guru prasekolah, pengasuh perlukan kelayakan lebih tinggi

KUALA LUMPUR 18 Ogos — Pendidik awal pendidikan kanak-kanak dan pengasuh di negara ini perlu mempunyai kelayakan yang lebih tinggi, kata Timbalan Perdana Menteri, Tan Sri Muhyiddin Yassin. Beliau berkata, Kementerian Pelajaran sedang dalam proses mengubah mekanisme dan syarat bagi membolehkan para pendidik dan pengasuh mencapai kelayakan yang lebih tinggi dalam masa terdekat. Muhyiddin yang juga Menteri Pelajaran berkata, ini perlu kerana walaupun kerajaan telah menjalankan pelbagai latihan untuk mempertingkatkan prestasi kemahiran para pengajar dan pengasuh, ia masih tidak mencukupi untuk menghasilkan pendidik awal kanak-kanak bertaraf dunia. "Semakin berilmu seseorang pendidik, semakin tinggi kemahiran mereka, dan semakin berkesanlah fungsi mereka sebagai pendidik dalam tahun-tahun formatif dan kritikal untuk perkembangan kanak-kanak," katanya ketika melancarkan Majlis Pengasuhan dan Pendidikan Awal Malaysia di sini hari ini. Mengambil contoh Rusia, Muhyiddin berkata negara itu telah lama memberi pengiktirafan kepada pendidikan awal kanak-kanak dan tenaga pengajarnya memiliki Ijazah Doktor Falsafah atau sekurang-kurangnya Ijazah Sarjana.

20 Ogos 2011 (Sabtu)

Isu Esso: Kerajaan disyor perkenal akta baru

KUALA LUMPUR 20 Ogos - Kerajaan disaran memperkenal satu akta baru mewajibkan syarikat asing yang beroperasi di negara ini supaya mendahului penjualan aset kepada syarikat tempatan jika berhasrat untuk keluar dari pasaran tempatan. **Setiausaha Agung Persatuan Pengguna Islam Malaysia (PPIM), Datuk Dr. Maamor Osman** berkata, akta itu akan membolehkan syarikat tempatan memiliki saham berkenaan sebelum tawaran dibuka kepada firma luar. "Sepatutnya akta ini sudah diperkenalkan kerana keutamaan harus diberi kepada syarikat tempatan apatah lagi jika jenis perniagaan itu mempunyai kaitan dengan pengguna tempatan. "Sekiranya tiada syarikat tempatan yang berminat atau tidak mampu, barulah tawaran itu dibuka kepada syarikat luar," katanya kepada *Mingguan Malaysia* di sini, hari ini. Beliau mengulas ura-ura penjualan 65 peratus kepentingan anak syarikat Exxon-Mobil kepada sebuah syarikat pengeluar minuman keras terbesar di Filipina, San Miguel Corp. yang dikatakan membuat tawaran keseluruhan RM514.25 juta untuk memilikinya.

Difahamkan, sebelum ini Bousted Holdings Berhad yang dimiliki oleh Tabung Lembaga Angkatan Tentera (LTAT) dikaitkan untuk membeli ekuiti Esso Malaysia dengan tawaran keseluruhan RM1 bilion. Sebelum ini, pelbagai pihak mendesak kerajaan campur tangan agar Exxon-Mobil tidak terlepas kepada pegangan syarikat asing. Maamor berkata, jika tiada syarikat tempatan yang benar-benar kukuh untuk memiliki kepentingan dalam Exxon-Mobil secara solo, syarikat gergasi tempatan disaran membentuk konsortium untuk memastikan ia tidak jatuh kepada syarikat luar. "Syarikat tempatan yang berpotensi seperti Kencana, Sapura dan Sime Darby boleh melaksanakan kerjasama itu. Syarikat-syarikat yang dinyatakan itu mempunyai keupayaan modal dan reputasi dalam bidang perniagaan yang diceburi sudah terbukti. "Kerjasama itu penting dan dapat menjaga kepentingan pengguna serta industri minyak di negara ini," katanya.

Menurutnya, walaupun urusan itu tidak membabitkan perjanjian dengan kerajaan, tetapi oleh kerana syarikat berkenaan telah banyak menjana keuntungan di Malaysia, maka adalah wajar perkara itu ditimbangkan. Ketua Penyelidikan dan Perundingan Jawatankuasa Kluster Ekonomi dan Kewangan Majlis Profesor Negara (MPN), Prof. Dr. Shazali Abu Mansor turut bersetuju jika ada entiti perniagaan tempatan yang mahu memiliki saham Esso Malaysia. "Ini penting bagi menjaga kepentingan strategik Malaysia dalam bidang peruncitan minyak. Saya tidak pasti apa motif Esso Malaysia sehingga mereka berminat untuk menjualnya kepada syarikat luar, mungkin ada pelan tersembunyi yang kita tidak tahu," katanya. Bagaimanapun menurutnya, jika benar LTAT mahu memilikinya, ia harus disusuli dengan langkah yang lebih serius.

20 Ogos 2011 (Sabtu)

RISDA bayar RM179.6j

Oleh MOHD. FAIRUZ YUSOF utusanpahang@utusan.com.my

PEKAN 20 Ogos - Datuk Seri Najib Tun Razak mengumumkan pembayaran dividen Pihak Berkuasa Kemajuan Pekebun Kecil Perusahaan Getah (RISDA) kepada 42,206 peserta sebanyak RM179.6 juta bagi 2010. Perdana Menteri berkata, pembayaran itu diberikan kepada peserta yang terlibat dalam Rancangan Tanaman Baru Berkelompok (RTBB) dan Tanam Semula Komersial (TSK). Beliau berharap, bayaran itu sedikit sebanyak membantu mereka untuk perbelanjaan sambutan hari raya nanti. "Semoga dividen yang diterima itu dapat meningkatkan pendapatan pekebun kecil pada masa akan datang," katanya pada majlis Penyampaian Dividen RTBB dan TSK Peringkat Kebangsaan di Dewan Konvensyen Sultan Ahmad Shah, di sini hari ini.

Hadir sama, Menteri Besar Pahang, Datuk Seri Adnan Yaakob, Menteri Kemajuan Luar Bandar dan Wilayah, Datuk Seri Mohd. Shafie Apdal dan Ketua Pengarah RISDA, Datuk Wan Mohamad Zuki Mohamad. Dalam pada itu, Najib meminta agensi kerajaan itu menyediakan pelan perancangan tindakan Model Baru Ekonomi (MBE) bagi meningkatkan taraf hidup pekebun kecil di negara ini. Menurutnya, segala cadangan dan inisiatif baru oleh RISDA melibatkan ekonomi golongan itu, boleh dikemukakan kepada kerajaan. "Bagi memastikan pekebun kecil tidak ketinggalan dalam kerangka MBE, RISDA diminta menyediakan perancangan tersebut. "Penyediaan itu perlu supaya sektor pekebun kecil boleh meningkatkan pendapatan dan tidak hanya berpuas hati dengan pendapatan antara RM1,000 dan RM2,000 sebulan sahaja," katanya. Najib berkata, perancangan itu membolehkan pekebun kecil kekal dalam bidang mereka dan menggunakan segala teknologi yang ada bagi meningkatkan pendapatan masing-masing. Selain itu, beliau juga meminta agensi tersebut melancarkan 'Gerakan Membaja' di seluruh negara supaya setiap pokok getah dibaja mengikut jadual yang betul. Beliau berkata, kaedah itu dapat meningkatkan hasil dan seterusnya meningkatkan pendapatan pekebun kecil selari dengan MBE.

20 Ogos 2011 (Sabtu)

RM4 bilion pinjaman PTPTN tahun ini

JOHOR BAHRU 20 Ogos - Perbadanan Tabung Pendidikan Tinggi Nasional (PTPTN) menyediakan pinjaman RM4 bilion untuk 206,938 penuntut yang layak pada tahun ini. Menteri Pengajian Tinggi, Datuk Seri Mohamed Khaled Nordin berkata, pinjaman itu diharap tidak disalahgunakan penerima dan dibelanjanya sepenuhnya untuk menampung kos pengajian mereka. "Kita harap para penerima akan memanfaatkan pinjaman untuk tentukan kejayaan mereka di universiti dengan menguruskan perbelanjaan secara berhemah. "Penerimanya berasal daripada keluarga berpendapatan bawah RM4,000 sebulan," katanya selepas majlis penyerahan borang PTPTN di Dewan Raya Seri Alam, Pasir Gudang, dekat sini hari ini.

Turut hadir, Ahli Dewan Undangan Negeri (ADUN) Permas, Datuk M. Munusamy; ADUN Johor Jaya, Tan Cher Puk dan Pengurus Bahagian Pinjaman PTPTN, Abd. Ghaffar Yusop. Menurutnya, hingga kini, sebanyak RM39.87 bilion telah diberikan kepada 1.8 juta penuntut universiti sejak PTPTN diperkenalkan. Beliau berkata, kerajaan akan meneruskan subsidi yuran pengajian di institusi pengajian tinggi awam (IPTA) antara 85 peratus hingga 90 peratus bagi meringankan beban rakyat." PTPTN juga hanya mengenakan caj satu peratus untuk pinjaman yang boleh juga dihapuskan jika pelajar memperoleh keputusan peperiksaan akhir yang cemerlang," katanya. Dalam perkembangan lain, beliau memberitahu, seramai 41,267 orang akan diambil memasuki IPTA bagi sesi 2011/2012 bermula September ini. Katanya, daripada jumlah itu, seramai 35,479 orang menerima pinjaman PTPTN berjumlah RM53.2 juta dan pendahuluan RM1,500 akan diberi untuk pendaftaran masuk iaitu pada 3 September dan 9 September ini.

20 Ogos 2011 (Sabtu)

GLC bermasalah dijual kepada syarikat bumiputera Oleh BORHAN ABU SAMAH

SHAH ALAM 20 Ogos - Unit Peneraju Agenda Bumiputera (Teraju) dalam usaha untuk melaksanakan pelupusan dan penjualan syarikat milik kerajaan (GLC) yang bermasalah dan tidak tersenarai kepada syarikat-syarikat milik bumiputera. Ketua Pegawai Eksekutif Teraju, Husni Salleh berkata, pihaknya sedang bekerjasama dengan Kementerian Kewangan dan Khazanah Nasional bagi merangka pelan tindakan itu. "Rancangan ini akan dibincangkan pada minggu hadapan... jika diluluskan akan dilaksanakan dengan segera," katanya ketika menjawab soalan peserta Konvensyen Memperkasa Model Baru Ekonomi: Satu Jihad Ekonomi Bumiputera anjuran Gagasan Badan Ekonomi Melayu (Gabem) di Universiti Teknologi Mara di sini hari ini. Keutamaan untuk membeli syarikat-syarikat berkenaan, kata beliau, akan diberikan kepada syarikat 1,100 syarikat bumiputera berwibawa yang sedang disenaraikan. "Syarikat-syarikat berkenaan akan dipadankan jangan kata syarikat besar mahu beli semuanya atau syarikat kecil nak beli sampai tak mampu bawa. "Kita kena tengok rekod syarikat dulu supaya saiz yang sesuai... pendekatan ini merupakan agenda ekonomi bumiputera yang besar," katanya.

20 Ogos 2011 (Sabtu)

Peneraju GLC perlu berjiwa Melayu - Resolusi

Oleh BORHAN ABU SAMAH

SHAH ALAM 20 Ogos - Peneraju syarikat berkaitan kerajaan (GLC) digesa dipilih di kalangan mereka yang mempunyai jiwa Melayu merupakan sebahagian daripada 25 resolusi dicapai pada Konvensyen Memperkasa Model Baru Ekonomi: Satu Jihad Ekonomi Bumiputera. Pengurus Gagasan Badan Ekonomi Melayu (Gabem), Tan Sri Rahim Tamby Chik berkata, teraju GLC juga perlu berani dan berhabis-habisan membantu Melayu dan bumiputera.

"Sehubungan itu GLC perlu mempunyai hubungan rapat dengan badan-badan bukan kerajaan (NGO) Melayu dan bumiputera," katanya ketika membentangkan resolusi pada konvensyen anjuran Gabem di Universiti Teknologi Mara di sini hari ini. GLC juga, ujar beliau, perlu mengelak daripada menjadi pesaing kepada usahawan Melayu dan bumiputera yang sedia ada. Resolusi-resolusi yang dipersetujui sebulat suara itu akan diserahkan kepada Timbalan Perdana Menteri, Tan Sri Muhyiddin Yassin yang akan menutup konvensyen itu petang ini dan dipanjang kepada Perdana Menteri, Datuk Seri Najib Tun Razak.

21 Ogos 2011 (Ahad)

Rencana -Keadaan dunia jejas kos sara hidup

Haim Hilman Abdullah

PASARAN saham dunia melalui satu lagi ujian getir pada 2011. Hal ini dapat dilihat apabila nilai saham berjumlah lebih daripada 62 bilion pound sterling lenyap di pasaran saham London baru-baru ini apabila indeks FTSE-nya jatuh sebanyak 239 mata atau 4.5 peratus kepada 5092. Perkara serupa berlaku terhadap Dow Jones Industrial Average (DJIA) AS apabila ia merekodkan kejatuhan lebih 419 mata atau 3.7 peratus kepada 10991. Sistem ekonomi dunia yang saling berkait telah menyebabkan apa yang berlaku di AS itu turut memberi kesan kepada pasaran saham lain di seluruh dunia termasuk Malaysia apabila KLCI turut jatuh iaitu di bawah paras 1500 mata. Kejatuhan pasaran saham dunia ini adalah kesan daripada pengumuman yang dibuat oleh agensi penarafan kredit terkemuka dunia iaitu Standard & Poor's (S&P). Secara khususnya penurunan taraf kredit AS daripada AAA kepada AA+ iaitu pertama kali berlaku dalam sejarah bukan sahaja memburukkan ekonomi AS tetapi dunia kerana dunia boleh sekali lagi terjerumus ke dalam kancang krisis ekonomi jika tidak ditangani secara komprehensif oleh AS khususnya dan lain-lain negara atau kuasa ekonomi amnya.

Kesan langsung daripada penurunan taraf yang dibuat oleh Standard & Poor's (S&P) itu telah membawa kepada kejatuhan nilai pasaran saham sebanyak AS\$2.5 trilion dalam tempoh seminggu sahaja selepas ia diumumkan. Dengan kata lain penurunan taraf ini telah mengundang rasa panik, hilang kepercayaan dan keyakinan dalam kalangan pengguna terhadap perniagaan dan pasaran kewangan. Sesetengah pihak beranggapan usaha pemulihan ekonomi AS sebelum ini boleh diibaratkan sebagai 'terhenti'. Andaian dan harapan sesetengah pihak bahawa ekonomi dunia akan pulih selepas AS melancarkan pakej pemulihan ekonominya pada 2007 akibat krisis subprima mungkin boleh dianggap sebagai meleset. Hari ini harapan yang dimahsyurkan oleh AS kepada warganya dan seluruh dunia tentang perancangan pemulihan ekonominya itu bagaikan menuju jalan 'mati'.

Seperti diketahui jumlah hutang subprima AS pada Mac 2007 berjumlah AS\$1.3 trilion telah meningkat sebanyak 79 peratus iaitu daripada AS\$730 bilion pada 2006. Kesan daripada krisis ini telah membawa kepada krisis ekonomi dunia. Negara terbabit telah memperuntuk sejumlah dana pemulihan ekonomi yang cukup besar. Sebagai contoh kerajaan AS memperuntukkan AS\$700 bilion, Great Britain sebanyak 500 bilion pound sterling, China AS\$586 bilion dan Malaysia sendiri sebanyak RM12 bilion atas nama untuk keluar dengan kadar segera dari kancang kemelesetan ekonomi. Namun demikian apa yang berlaku hari ini jelas menunjukkan bahawa dunia masih belum bebas sepenuhnya dan tidak mustahil terjerumus sekali lagi ke dalam kancang kejatuhan ekonomi kali yang kedua dalam tempoh tidak sampai sedekad. Keadaan ini jelas menunjukkan bahawa strategi menyuntik sejumlah dana pemulihan ekonomi yang besar belum mampu membebaskan mereka daripada kemelut kelembapan ekonomi. Dengan kata lain kerajaan setiap negara perlu memberi penekanan terhadap pembentukan polisi dan pakej rangsangan dan agihan yang lebih komprehensif dan cekap.

Di samping itu satu usaha ke arah mewujudkan kerjasama lebih erat di peringkat serantau, antarabangsa dan global amat perlu diusahakan. Pendekatan sedemikian mampu membantu negara terbabit membangunkan pelan pemulihan ekonomi yang komprehensif di ketiga-tiga peringkat pemulihan iaitu jangka pendek, sederhana dan panjang negaranya sahaja tetapi serantau, antarabangsa dan dunia. Namun demikian usaha memulihkan ekonomi bukan sahaja mengambil masa tetapi menuntut kerjasama politik yang tinggi (domestik, serantau, antarabangsa dan dunia). Ekonomi sesebuah negara akan lebih sukar untuk dipulihkan sekiranya ahli politiknya lebih gemar mencari keuntungan politik dari duduk bersama mencari jalan pemulihan terbaik. Kerajaan Hakikat jelas membuktikan bahawa realiti ekonomi negara hari ini banyak dipengaruhi oleh perkembangan ekonomi dunia. Sebagai sebuah kerajaan yang diberi mandat oleh rakyat maka ia bertanggungjawab memastikan kelangsungan ekonomi Malaysia. Isu-isu seperti peningkatan inflasi, kos sara hidup, gejala sosial, jenayah dan kesukaran mendapat pekerjaan amat berkait rapat dengan masalah kemeleseten ataupun kelembapan ekonomi. Untuk itu ia harus ditangani secara terancang dan bukan bersifat ad hoc.

Mengambil kira kadar inflasi negara seperti dilaporkan pada Julai 2011 ialah 3.1 peratus berbanding purata untuk tempoh 2005 hingga 2010 iaitu 2.77 peratus jelas menunjukkan persekitaran ekonomi semasa dunia telah menyumbang kepada peningkatan inflasi dan ekonomi negara. Dengan kata lain jika permasalahan ekonomi dunia hari ini tidak ditangani dengan baik maka tidak mustahil untuk negara sekali lagi terjurumus kepada kadar tertinggi yang pernah direkodkan dalam sejarah negara iaitu 8.50 peratus pada Julai 2008. Untuk itu agensi-agensi kerajaan dan swasta terutamanya yang berkaitan dengan penghasilan barang pengguna perlu mengambil langkah proaktif dalam memastikan mereka dapat berperanan secara efektif dalam segala aspek berkaitan penghasilan barang pengguna ataupun penghasilan negara dapat dilakukan pada tahap kecekapan tertinggi. Dengan kata lain agensi-agensi kerajaan berkaitan sewajarnya menyediakan polisi dan sokongan berkesan dalam mendokong pengamal industri menghasilkan produk mereka secara cepat, murah, berkualiti, selamat dan konsisten.

Jika usaha kolektif ini (agensi kerajaan dan pengamal industri) dapat direalisasikan maka adalah tidak mustahil untuk negara menurunkan lagi kadar inflasinya iaitu ke tahap lebih rendah. Di samping itu kerajaan turut perlu memastikan dasar monetarinya bersesuaian dengan persekitaran semasa, dasar fiskal yang berhemat dan menjurus kepada kecekapan maksimum, memastikan kawalan harga barang melalui penguatkuasaan benar-benar berlaku dan secara berterusan, melakukan kawalan bekalan seperti melonggarkan kuota import bila perlu, mewujudkan stok penimbang kebangsaan, memastikan Pusat Panggilan Kebangsaan benar-benar berfungsi secara berkesan dalam menerima aduan pengguna dan menyalurkannya kepada pihak berwajib untuk tindakan penguatkuasaan. Majlis Harga Negara yang telahpun wujud wajar berperanan pada tahap kecekapan tertinggi dalam memantau paras harga dan merangka dasar bersesuaian bagi menjamin kestabilan harga dan kecekapan sistem bekalan dan pengedaran negara tercapai.

NKRA dan NKEA .Kos sara hidup rakyat yang semakin meningkat juga wajar ditangani secara serius. Menjadikannya sebagai satu lagi NKRA negara adalah satu langkah yang baik. Namun begitu ia sepatutnya lebih awal lagi telah menjadi salah satu daripada NKRA. Pada dasarnya banyak faktor yang menyumbang kepada isu peningkatan kos sara hidup ini. Salah satu punca utamanya ialah pendapatan perkapita rakyat yang masih rendah. Menguatkuasakan undang-undang berkenaan pembayaran gaji minimum adalah penyelesaian jangka pendek. Langkah yang lebih wajar diambil ialah mentransformasi sektor pembuatan dan perkhidmatan negara sepenuhnya.

22 Ogos 2011 (Isnin)

Bersedia hadapi krisis ekonomi dunia - DATO' SALLEH MAJID,

KHAMIS lalu, sekali lagi bursa saham dunia runtuh lagi dengan Dow Jones jatuh sehingga 500 mata selepas satu jam dibuka dagangan. Sektor teknologi lemah dan tuntutan pekerjaan lebih tinggi. Bon perbendaharaan 10 tahun Amerika Syarikat jatuh ke paras bawah 2 peratus (%). Sesuatu yang tidak pernah berlaku. Di Eropah, FTSE jatuh sebanyak 4.36%, di Perancis CAC jatuh sehingga 6%, bursa Jerman DAX jatuh 5.42%. Emas telah meningkat ke paras AS\$1,823.65 seauans. Sementara itu, minyak di pasaran New York jatuh ke paras AS\$83 setong dengan jangkaan permintaan akan menurun. Memanglah ada dalam kalangan pemimpin kita yang mengatakan kita terlindung daripada krisis ekonomi semasa kerana kita banyak berdagang dengan negara-negara ASEAN dan Asia seperti China dan India dan bukan negara-negara Eropah. China sendiri sedang bergelut untuk membendung inflasi dan India berdepan dengan defisit. Kebimbangan tentang ekonomi dunia menuju ke arah kemelesetan dimanifestasikan oleh keruntuhan bursa-bursa saham dunia sebanyak dua kali dalam bulan ini saja. Terbaru kebimbangan bank pusat di Amerika tentang unit-unit bank Amerika di Eropah yang mungkin berdepan dengan kekurangan dana. Pertumbuhan negara Jerman yang lebih rendah untuk penggal kedua dan perbincangan antara Perancis dan Jerman yang tidak mencapai sesuatu kata sepakat dalam menyelesaikan masalah krisis hutang Euro, meningkatkan lagi kebimbangan pelabur. Bank Negara Malaysia pada Rabu lepas menyatakan pertumbuhan 4% untuk penggal kedua tahun ini. Penggal pertama kita telah mencatat pertumbuhan sebanyak \$4.3%. Walaupun mengakui keadaan ekonomi global yang semakin lemah, Bank Negara masih yakin kita boleh mencapai pertumbuhan 5-6%. Mengapakah kita tidak mahu mengakui yang keadaan ekonomi dunia yang lemah ini akan memberi kesan kurang baik kepada ekonomi kita yang bergantung kepada eksport dan keadaan defisit fiskal kita yang tinggi? Para penganalisis antarabangsa mengakui kesan yang bakal kita hadapi ini. Kita seolah-olah ingin memberi gambaran yang tidak ada apa-apa yang akan mengganggu-gugat ekonomi kita.

Sekiranya harga minyak menurun, ini akan memberi kesan kepada pendapatan negara yang 40% datangnya daripada pendapatan minyak. Kita juga berdepan dengan harga barang-barang yang meningkat yang seterusnya meningkatkan kos sara hidup. Kerajaan tidak mampu lagi untuk menambah subsidi untuk membendung kenaikan harga barang-barang tanpa meningkatkan lagi defisit yang sudah tinggi. Dengan mata wang ringgit semakin kukuh berbanding dolar Amerika (disebabkan ekonomi Amerika yang lemah) dan permintaan dunia yang dijangka kurang, pengeksport kita mungkin mencatat angka-angka perolehan yang lebih rendah. Kebanyakan pendapatan bank datangnya daripada pinjaman isi rumah yang kini mencapai 75% daripada keseluruhan pinjaman. Rasanya masa sudah sampai bagi kerajaan "mengetatkan pinggang" mengurangkan pembaziran perbelanjaan. Kalau dapat dikurangkan 5% sekalipun, kita sudah dapat mengurangkan lebih kurang RM10 bilion daripada perbelanjaan. Perbelanjaan seperti perasmian itu dan ini patut dikurangkan, latihan yang menggunakan hotel-hotel dan resort-resort pun patut beralih kepada dewan-dewan kerajaan yang tidak kurang kemudahan mereka. Untuk belanjawan tahun hadapan permintaan jabatan-jabatan dan kementerian sepatutnya zero-based berdasarkan keperluan dan bukan secara incremental. **Perbelanjaan atas barang-barang dengan harga yang bukan-bukan seperti yang lazim dilaporkan oleh Ketua Audit Negara perlu dielakkan.** Ada pendapat yang mengatakan kita perlu melaksanakan cukai barang dan perkhidmatan (GST) untuk meningkatkan pendapatan negara tetapi tiada siapa yang tahu bila masa yang sesuai untuk dilaksanakan. Rasanya kalau diamalkan perbelanjaan yang berhemah apa yang boleh diperolehi adalah lebih tinggi daripada yang bakal diperolehi dengan pelaksanaan GST. Sikap "ini duit kerajaan bukan duit aku" perlu dikikis oleh penjawat awam dan orang ramai. Inilah satu-satunya kempen yang perlu dilakukan secara besar-besaran di seluruh negara dan melalui secara bentuk media. Dengan keadaan ekonomi dunia yang lemah dan kos sara hidup yang meningkat, apakah sesuai diadakan pilihan raya dalam jangka masa terdekat ini?

22 Ogos 2011 (Isnin)

Kerajaan terus bantu LTAT

Oleh SYUKRI SHAARI pengarang@utusan.com.my

KUALA LUMPUR 22 Ogos - Kerajaan mengulangi pendirian bahawa ia sedia membantu Lembaga Tabung Angkatan Tentera (LTAT) berhubung rancangannya untuk membeli 65 peratus ekuiti dalam Esso Malaysia Berhad (Esso). Menteri Perdagangan Dalam Negeri, Koperasi dan Kepenggunaan, Datuk Seri Ismail Sabri Yaakob berkata, pihaknya akan berusaha membantu LTAT membida untuk membeli pegangan ekuiti tersebut kerana sedar kepentingannya kepada ekonomi syarikat tempatan. Bagaimanapun katanya, pihak kementerian tidak dapat membantu lebih daripada itu kerana pada akhirnya ia merupakan urusan perniagaan yang mempunyai kepentingan kepada kedua-dua pihak. "Kami akan membantu. Malah saya sendiri telah menghubungi pihak Esso di Amerika Syarikat mengenai hasrat supaya menjualnya kepada LTAT. "Bagaimanapun, pihak kementerian tidak boleh terlalu mencampuri urusan tersebut kerana ia akan memberi gambaran buruk kepada pelabur dari luar sekiranya kerajaan selalu campur tangan." Pada peringkat ini, kami hanya mampu menjadi jurucakap kepada LTAT dalam usaha mereka membida 65 peratus ekuiti Esso. Secara jujurnya kami berharap mereka berjaya tetapi siapa yang tahu, ini merupakan urusan perniagaan," katanya ketika ditemui pada majlis berbuka puasa Perbadanan Harta Intelek Malaysia (MyIPO) bersama anak-anak yatim di sini, hari ini. Ismail Sabri mengulas ura-ura penjualan 65 peratus kepentingan anak syarikat ExxonMobil kepada syarikat minuman keras Filipina, San Miguel Corporation (SMC) yang dikatakan membuat tawaran keseluruhan bernilai RM514.25 juta untuk miliknya. Difahamkan, sebelum ini Boustead Holdings Berhad yang dimiliki oleh LTAT dikaitkan untuk membeli ekuiti Esso Malaysia dengan tawaran keseluruhan RM1 bilion.

22 Ogos 2011 (Isnin)

MRT: Prasarana akan terus urus isu

KUALA LUMPUR 22 Ogos - Syarikat Prasarana Negara Bhd. (Prasarana) akan terus menguruskan semua isu berkaitan projek My Rapid Transit (MRT) sehingga MRT Co ditubuhkan. Prasarana akan bekerjasama dengan kerajaan dan Unit Pengurusan Prestasi dan Pelaksanaan (Pemandu) bagi memastikan kesemua kerja terus berjalan lancar dan mengikut jadual, kata Pengarah Urusan Kumpulan, Shahril Mokhtar dalam satu kenyataan hari ini. "Kerja-kerja mengenai projek MRT perlu diteruskan. Adalah rasional bagi kami melaksanakan kerja dan program yang telah diputuskan sebelum kami menyerahkan secara rasmi projek itu kepada MRT Co yang baharu," katanya. Shahril berkata beberapa perkara berkaitan pemerolehan dan taklimat telah dilaksanakan manakala satu taklimat dijadual diadakan dengan para pemilik hartanah di Jalan Bukit Bintang mengenai isu pengambilalihan tanah hari ini.

"Esok, kami akan mengadakan satu taklimat pra tender bagi kesemua kontraktor pra kelayakan. Kesemua mesyuarat itu dan jadual yang sudah disahkan perlu dilaksanakan tanpa gangguan," katanya. Prasarana, katanya yang diwujudkan untuk mentransformasi sistem pengangkutan awam negara, memerlukan sokongan dari pihak yang relevan yang lain bagi mencapai matlamatnya. "Pengangkutan awam sentiasa mempunyai kaitan rapat dengan kesemua rakan kami dan pihak berkepentingan. MRT Co adalah satu rakan kami yang baharu berkaitan MRT, yang akhirnya akan menjadi sebahagian daripada perkhidmatan dan tanggung jawab kami, apabila siap kelak," katanya. Minggu lepas, Perdana Menteri Datuk Seri Najib Tun Razak mengumumkan bahawa Kabinet telah memutuskan untuk memperbadankan MRT Co di bawah Kementerian Kewangan Diperbadankan bagi mengawasi secara langsung projek berbilion MRT Lembah Klang itu.

23 Ogos 2011 (Selasa)

Cawangan baru UiTM bernilai RM300j di Raub



Shahiruddin Ab. Moin (lima dari kanan) menyerahkan bonus hari raya kepada para peneroka Felda Krau 1 di Raub, semalam.

RAUB 22 Ogos - Kerajaan akan membina cawangan Universiti Teknologi Mara (UiTM) di sini dengan membatikan peruntukan sebanyak RM300 juta tidak lama lagi. Ahli Dewan Undangan Negeri (ADUN) Dong,

Datuk Shahiruddin Ab. Moin berkata, lokasi pembinaan kampus cawangan itu telah dikenal pasti iaitu berhampiran bandar ini membatikan kawasan seluas 100 hektar. Menurutnya, kampus itu nanti dijangka boleh menempatkan 3,000 pelajar dari seluruh negara bagi pengajian kejuruteraan. "Kewujudan kampus baru itu akan memberi manfaat kepada penduduk daerah ini kerana ia mampu merancakkan pertumbuhan ekonomi serta memberi banyak peluang perniagaan bagi memenuhi keperluan 3,000 pelajar berkenaan," katanya pada majlis penyerahan bonus hari raya kepada para peneroka. Mereka adalah dari Felda Krau, Sungai Klau dan Felda Gugusan Tersang di pekarangan masjid Felda Krau 1 dekat sini semalam. Beliau berkata, cawangan baru itu di sini akan memberi keutamaan pelajar dari Pahang Barat, Kelantan dan Terengganu serta peluang pelajar asing bagi jurusan Kejuruteraan Mekanikal, Elektrikal, Awam dan sebagainya. Dalam perkembangan lain, Shahiruddin yang juga Pengurus GiatMara memberitahu, pelatih GiatMara dalam kemahiran kimpalan mempunyai peluang cerah untuk bekerja di 6,000 syarikat kimpalan di seluruh dunia. Katanya, pada 1 Ogos lalu, GiatMara menandatangani perjanjian bersama (MoA) dengan Institut Teknikal Kimpalan (TWI) London, Universiti Cambridge, United Kingdom. "Melalui perjanjian itu, TWI akan melatih tenaga pengajar GiatMara dalam bidang kimpalan menerusi kursus jangka pendek antara 30 hingga 90 hari," katanya.

23 Ogos 2011 (Selasa)

PTPTN saman 184,083 gagal bayar pinjaman

KUALA KRAU 23 Ogos - Perbadanan Tabung Pendidikan Tinggi Nasional (PTPTN) bertindak menyaman 184,083 peminjam setelah mereka gagal menjelaskan pinjaman sehingga 31 Julai lalu. Pengurusnya, Datuk Ismail Mohamed Said berkata, daripada jumlah itu, seramai 93,861 peminjam telah menerima surat saman dari mahkamah. Jelasnya, berikutan itu seramai 8,893 orang bersetuju membayar pinjaman manakala 59,540 peminjam terus ingkar dan bakinya tidak memberi sebarang maklum balas. "PTPTN menarik balik saman terhadap 4,712 peminjam setelah mereka bersetuju menjelaskan pinjaman masing-masing melalui pelbagai kaedah. "Secara keseluruhannya sehingga akhir bulan lepas seramai 19,499 peminjam masih dalam kategori aktif untuk disaman kerana sikap mereka yang lepas tangan untuk membayar hutang walaupun berkemampuan," katanya. Beliau berkata demikian kepada *Utusan Malaysia* selepas majlis penyerahan sumbangan kepada pesakit dan majlis berbuka puasa di pekarangan Hospital Jengka semalam. Hadir sama Ahli Dewan Undangan Negeri (ADUN) Jengka, Wan Salman Wan Ismail dan Pengarah Hospital Jengka, Dr. Safaridah Anuar. Ismail memberitahu, seramai 132,801 peminjam telah disenarai hitam oleh Jabatan Imigresen akibat kegagalan mereka membayar pinjaman PTPTN. Katanya, daripada bilangan itu seramai 15,931 peminjam membuat bayaran balik melibatkan kutipan kira-kira RM135 juta. Dalam pada itu, beliau memberitahu, sehingga kini seramai 516,079 orang telah menuaikan waran Wang Pendahuluan Pembiayaan (WPP) berjumlah RM755.52 juta dengan kemasukan ke institusi pengajian tinggi (IPT) bagi sesi September ini membatikan peruntukan sebanyak RM53.22 juta.

23 Ogos 2011 (Selasa)

Kerajaan teliti cadangan beri 4 hektar tanah Orang Asli

SUNGAI SIPUT 23 Ogos - Kementerian Kemajuan Luar Bandar dan Wilayah sedang meneliti cadangan memberi tanah tidak melebihi empat hektar kepada setiap keluarga Orang Asli menerusi Dasar Pemberimilikan dan Pembangunan Tanah Orang Asli yang sedang digubal. Menterinya, Datuk Seri Mohd. Shafie Apdal berkata, cadangan itu atas permintaan masyarakat Orang Asli sendiri yang membantah pemberian tanah seluas 0.8 hingga 2.4 hektar dalam dasar tersebut sebelum ini. "Kementerian sedang mengadakan perbincangan mengenai perkara ini dengan Pahang, Negeri Sembilan, Johor, Melaka, Perak, Terengganu, Kedah, Kelantan dan Selangor. "Setakat ini perbincangan itu mendapat maklum balas positif. Secara umumnya semua negeri bersetuju dengan keputusan Majlis Tanah Negara untuk melaksanakan pemberian individu kecuali Kelantan yang mahu penempatan Orang Asli diwartakan dahulu," katanya. Beliau berkata demikian selepas menghadiri majlis ramah mesra dan berbuka puasa bersama masyarakat Orang Asli di Kampung Kenang, di sini, malam tadi. Turut serta Ketua Pengarah Jabatan Kemajuan Orang Asli (Jakoa), Datuk Mohd. Sani Mistam.

Menerusi Dasar Pemberimilikan dan Pembangunan Tanah Orang Asli, masyarakat Orang Asli berpeluang memiliki tanah yang akan dibangunkan oleh Jakoa mengikut konsep Felda dan Felcra. Berdasarkan rekod Jakoa sehingga 31 Disember 2010, Orang Asli yang populasinya sekitar 150,000 orang cuma memiliki tanah seluas 1,424.31 hektar secara individu walaupun menduduki dan mengusahakan tanah seluas 145,379.67 hektar di negara ini. Dalam perkembangan lain, Mohd. Shafie memberitahu, seramai lapan pelajar Orang Asli yang cemerlang akan dihantar melanjutkan pengajian ke luar negara pada tahun ini. Katanya, setakat ini seorang sudah melanjutkan pelajaran ke Universiti of New South Wales, Australia melalui tajaan Majlis Amanah Rakyat (Mara) dan seorang lagi yang mendapat tajaan Jabatan Perkhidmatan Awam (JPA) sedang menunggu giliran untuk ke luar negara. "Kita akan hantar enam lagi anak Orang Asli melanjutkan pengajian ke universiti di United Kingdom, Australia, Jepun dan New Zealand pada tahun ini. Mereka sedang mengikuti persediaan untuk ke luar negara," katanya. Sementara itu, Mohd. Shafie berkata, setakat ini pihaknya belum menerima laporan kajian struktur tanah Kampung Sungai Ruil di Cameron Highlands yang terlibat dalam kejadian tanah runtuhan dari Jabatan Mineral dan Geosains.

26 Ogos 2011 (Jumaat)

MITI bincang penjualan Esso dengan agensi lain kerajaan

KUALA LUMPUR 26 Ogos - Kementerian Perdagangan Antarabangsa dan Industri (MITI) akan mengadakan perbincangan dengan agensi lain kerajaan berhubung penjualan pegangan ExxonMobil International Holdings dalam Esso Malaysia Bhd. Menterinya Datuk Seri Mustapa Mohamed berkata, beliau telah mengadakan mesyuarat dengan Kementerian Perdagangan Dalam Negeri, Koperasi dan Kepenggunaan Datuk Seri Ismail Sabri Yaakob berhubung isu itu. "Perkara ini akan melibatkan agensi kerajaan lain dan bukan MITI sahaja," kata Mustapa pada taklimat media di sini hari ini. Beliau berkata, MITI masih belum menerima sebarang makluman rasmi daripada ExxonMobil International mengenai hasratnya melepaskan pelaburannya dalam Esso Malaysia.

27 Ogos 2011 (Sabtu)

Negara hijau, apakah pendirian kita?

Oleh Mohd. Hazli Hassan

BAYANGKAN untuk menjadikan rumah kita yang berkeluasan 24x70 kaki sebagai sebuah ‘rumah hijau’ yang mampu menjana, menyimpan dan mengurus tenaga dengan berkesan, kita hanya memerlukan RM100,000. Kos ini termasuk penyelesaian bekalan tenaga yang menggunakan sistem solar terkini, penyimpanan bekalan tenaga menggunakan bateri litium ion dan peralatan jimat tenaga daripada Panasonic yang mampu mengurangkan penggunaan tenaga berlebihan. Mungkin bagi yang tidak memahami keperluan penjimatan tenaga akan merasakan jumlah ini terlalu tinggi, bahkan, merasakan ia satu pembaziran. Namun inilah hakikat masa kini untuk kita memasang peralatan dan menggunakan peralatan jimat tenaga. Ia tidak datang dengan harga murah, malah dengan insentif yang diberikan kerajaan, kos kepada golongan berpendapatan sederhana masih tinggi. Jadi apakah hasrat kerajaan untuk mencapai status negara hijau akan berhasil dek kerana kos yang tinggi ini? Jika sekarang, kerajaan sedang hebat mempromosikan insentif diskaun jika membeli peralatan jimat tenaga yang mempunyai rating 5 bintang, adakah ia mencukupi untuk memberi kesedaran mengenai penjimatan penggunaan tenaga kepada 28.7 juta rakyat negara ini?

Pada saya, mungkin tidak sampai 10 peratus akan sedar, manakala selebihnya hanya tunggu dan lihat atau tunggu tanpa mahu melihat. Bukan apa, mereka yang selebih itu sudah disogok dengan kemudahan yang amat senang dalam kehidupan sehari-hari. Petik suis, ada lampu, buka paip ada air. Jika panas, penghawa dingin boleh digunakan dengan kadar suhu paling minimum. Cukup bulan bayar saja bil. Bagi mereka, kenapa perlu susahkan diri mencari wang menukar rumah sedia ada kepada rumah jimat tenaga. Ini semua disebabkan mereka berfikiran cetek dan mementingkan diri sendiri. Cuba fikir dari mana sumber bekalan tenaga yang kita peroleh sekarang? Apakah puncanya? Dan jika puncanya habis apa akan terjadi? Antara sumber yang digunakan untuk menjana bekalan tenaga adalah arang batu dan minyak diesel. Kedua-dua sumber ini amat terhad dan akan habis selain penjanaan menggunakan sumber ini akan membebaskan karbon dioksida (CO₂) dengan kadar tinggi. Pembebasan CO₂ memang diketahui sesuai untuk fotosintesis tumbuh-tumbuhan namun jika pelepasannya terlalu banyak, apa akan terjadi? Laporan Pembangunan Manusia bagi 2007/2008 menyatakan bahawa Malaysia mempunyai syer 0.6% dalam jumlah pelepasan gas CO₂ dunia pada 2004. Jumlah pelepasan CO₂ pada 1990 adalah 55 juta tan, manakala pada 2004 pula 177 juta tan. Berlaku peningkatan 221% dalam tempoh tersebut. Kajian Pusat Analisis Informasi Karbon Dioksida (<http://cdiac.ornl.gov/> trends/emis/mys.html) pula menyatakan Malaysia menduduki ranking ke-27 bagi negara-negara yang melepaskan CO₂. Adakah ini satu kebanggaan?

29 Ogos 2011 (Isnin)

Technip bida projek RM3 bilion?

Oleh AZMAN IBRAHIM bisnes@utusan.com.my



Salah sebuah pelantar minyak di perairan Malaysia yang membuka peluang perniagaan kepada syarikat tempatan seperti Technip.

KUALA LUMPUR 29 Ogos – Technip Geoproduction Sdn. Bhd. (Technip), penyedia kemudahan fabrikasi platform minyak dan gas kini dalam proses mengemukakan tender untuk projek laut dalam bernilai AS\$2.1 bilion (RM3 bilion) milik syarikat minyak dan gas di Malikai, Sabah. Berikutnya proses berkenaan nama

syarikat minyak dan gas yang ditender itu belum dapat dinyatakan. Menurut Pengarah Urusan Technip Malaysia, Edgar Pushparatnam berkata, sebelum ini, Technip telah pun menyempurnakan dua projek mereka bentuk fabrikasi platform minyak dan gas iaitu di Kikeh (Murphy) dan Gumusut (Shell), kedua-duanya di Sabah. "Melalui pelbagai projek yang rancak ini, kami mahu menjadikan Malaysia sebagai pusat laut dalam Asia Pasifik dalam tempoh beberapa tahun akan datang," kata beliau kepada Utusan Malaysia di sini hari ini. Technip ditubuhkan di Malaysia pada 1982 sebagai ibu pejabat Technip Asia Tenggara dengan lebih 1,400 kakitangan. Tambah Pushparatnam, Technip setakat ini menerima tempahan berjumlah AS\$950 juta (RM 2.8 bilion) untuk sepanjang tahun ini. Beliau berkata, ia merupakan petanda industri minyak dan gas bakal tumbuh secara berterusan dari setahun ke setahun. "Kami mempunyai perancangan jangka panjang untuk memastikan syarikat menerima projek yang berterusan," ujarnya. Ditanya tentang kilang pembuatan paip fleksibel di Komplek Industri Tanjung Langsat di Johor, Pushparatnam menambah, sektor perkilangan itu banyak membantu syarikat dalam industri minyak dan gas laut dalam. Katanya, setakat ini, hanya terdapat tiga kilang pembuatan paip fleksibel di dunia iaitu di Brazil, Perancis dan Asia Pasifik. "Malaysia amat bertuah kerana memiliki kilang keempat pembuatan paip fleksibel di dunia," ujarnya. Menurut Pushparatnam lagi, Fasa 1 pembinaan kilang tersebut menelan perbelanjaan sebanyak RM600 juta dan fasa kedua RM50 juta.

31 Ogos 2011 (Rabu)

Selepas 50 tahun, Singapura serah kemudahan loji air

JOHOR BAHRU 31 Ogos – Sultan Johor, Sultan Ibrahim Sultan Iskandar hari ini berkenan menyaksikan majlis penyerahan kemudahan loji rawatan air dan rumah pam secara rasmi oleh Lembaga Perbekalan Awam Singapura (PUB) kepada kerajaan negeri Johor. Majlis menandatangani penyerahan dua loji rawatan air dan dua rumah pam milik PUB disempurnakan secara bersama oleh Pengerusi PUB, Tan Gee Paw dan Setiausaha Kerajaan Negeri, Obet Tawil di Loji Air Gunung Pulai di sini. Turut hadir pada majlis bersejarah itu ialah Menteri Besar Johor, Datuk Abdul Ghani Othman dan Menteri Sekitaran dan Sumber Air Singapura, Dr Vivian Balakrishnan. Selain Loji Air Gunung Pulai, PUB menyerahkan Loji Air Sungai Skudai, Rumah Pam Tebrau dan Rumah Pam Pontian berikutnya kontrak bekalan air selama 50 tamat antara PUB dan kerajaan negeri Johor di bawah Perjanjian Air 1961 hari ini. Dalam ucapan pada majlis itu, Abdul Ghani mengucapkan terima kasih kepada PUB kerana mengurus dan menjaga semua kemudahan loji rawatan air dan rumah pam berkenaan dalam keadaan baik sepanjang tempoh perjanjian tersebut. "Loji rawatan air Gunung Pulai adalah berkualiti tinggi dan kerajaan Johor bercadang meneruskan usaha baik PUB itu," katanya. Beliau juga berkata, kerajaan negeri menimbang untuk menaiktaraf semua kemudahan berkenaan demi menampung permintaan bekalan air bagi penduduk Johor Bahru dan Pontian.